

Rom Quran

Polji Rom yoṅore Quran ruaya.

Mimitaniṅ

Rom sitio yauraine gobi maṅkekerisie kubuine kubuine yoṅoji botuyanṅo siṅsaṅ qarurouṅaru gobuṅ. Juda goineji manyaṅuṅ kerisieru Juda eeboboo eru Kadi buṅoo qakatoru Anuture moge sakiyaṅuṅo ketigaru joma so noku gobuṅ. Kotu kantrire maṅkekerisie kubu yoṅoji Anuture yaunmoririgo qakatoru Anuture Kadi buṅo rurumaṅgo so raru sigopou paiineo agiburaṅ afagaru enimiṅgo manebuṅ. (6.15) Anutuji Juda kufufuṅ foriine ṅadi yaberu tifeyaṅuṅo kotu ṅiṅigo oṅga yareko biṅeine fukebuṅ, ore eru goueru igosisi eyarebuṅ. (11.18-20) Oṅu eru Juda maṅkekerisie yoṅoji mosiyaṅuṅ raṅbaṅine oṅuakoṅ boyobebuṅ ore eru mipemiriṅ eyareku gobuṅ. Juda kubu yoṅoji kotu kantrire maṅkekerisie ogopuyaṅuṅ sure yaberu Juda mosiyaṅuṅ so boyobebuṅ ore eru buṅoyaṅuṅ fofoaṅ mitariku sigopou gobuṅ. (2.17-20; 14.3)

Qodure yabeṅ ore Polji kubu yoyoka yoṅore kajeqouṅ buṅo bubu quraṅga yareega. Juda yoṅore fuṅne barariṅga yareko (2.21-27) kotu kantri yoṅoji jeriebuṅ. Buṅo qoruine iṅi yajiya, “Yesu manesiṅ gabeneṅ Anutuji mamananiṅnoṅuṅ ṅoneru buṅonoṅuṅ mitariko posikekiminṅ. Kadi furuine mo so pega.” (1.17) Kotu kantri ṅiṅigo sigokeiṅyaṅuṅ qomukuinṅ ore

funneyanun bararinga yareru inji yajiya: “Anutuji nono-nanunde finere eru matayon, inoyonunde nonemainde eru nono roosoe nabeya. (11.30-32) Ore eru yamej keku Kadi bunjo renjaru goinebi. (7.12-24) Sosowo yobu agiburande nigin gbedio goku egu sibirigakimin ore egobeneyon, (3.23; 5.12) Anutuji inoyonunde yombenji wakiin ore eru Kristo soreya. (5.8-9) Moro Tiriineji bomukuru agiburan nonemainde usungone pirue nobein. Ore eru agiburan eebobo bokeru (6.11-14) qodureru manjoko nadungadun eku yauraine yonore botugo yauraine onjine so goinebi.” Kajeqoun onjine yareme waigo waigo renjaru qodureru gobun. Polji daman funfungaine Rom rako kitin etebi jikigaru Spein morengo rainjo maneru onu quranaya.

Buk yoore mobe qoruine 7 oi inji:

Mimitanin bunjo eru bunjo qoruine 1.1-17

Sosowoji agiburande munanqoqore embimbinqagobonen 1.18-3.20

Anutuji munan qa noreega ore funjine 3.21-4.25

Kristoke gogo gariinere funjine 5.1-8.39

Israel yonoji Anuture mamanesu buruo gogobi 9.1-11.36

Mankekerisie ninore mosi eebobore bunjo 12.1-15.13

Bunjo tatariine eru inoyonere momojo bunjo 15.14-16.27

¹ Pol non Yesu Kristore gio bobo ni eru Rom mankekerisie ninigo nonoke bunjo mi manekimin ore wareru quran yo quranago. Anutuji onga nareko sosore ni aposol fukego. Anutuji Bobian Binjine misaueinjo ore roosoe nume gogo.

sosowo ñoñore eru Anutune danje miego. ⁹ Nonji manj anjine sosowo Anutune gioo ruaru kinjanjine qaku Madeinere Bobianj Biñe mitaniñgaego. Oo jijiki ñoño manesu ñareego, oi Anutuji kitiñgaku miega.

¹⁰ Damanj so inji miku oñga wosiego, “O Anutu, nonji Rom yoñoreo rabemiñgo maneru damanj joroine odigago. Ore eru go anjigore so minde kadi fukeko damanj yoo soine rabemiñ.”

¹¹ Ñone ñaberu mamanesiñ-ñañunji sananğaiñ ore maneru soine gio bobore mamane yaunj mo ñarebemiñ. Ore eru damanj funfunğaine ñoñoreo wareru ñone ñabebemiñgo anj sogo maneru gogo.

¹² Inji ekimiñgo anj sogo maneego: Nonji ñone ñabebe qodureku noñ eru ñoño uruñu manesiñ gaegobeneñ, oi mimane eku manji kitiñgaku beufi eekimiñ.

¹³ O manjekerisie ogopune, ñoño inji manesuku goinebi: Nonji kotu kantri goine yoñore botugo roregaru manjanunj bapakare yabebe kerisiebuñ, ore so ñoñore botugo oñuakonj foriine fukeko ñonebemiñgo manego. Ore eru damanj kokoine ñoñoreo iqi warebeminde buru ruaru gobonjonj, ya goineji damanjine damanjine kipe nuko embimbiñgabonj.*

¹⁴ Anutune jinoo tife inji pe narega: Niñigo kubu funne funne bapi yabebeminde buñoji nonde paio pega. Niñigo manğboronjanunjke eru qanda (grasrut) yoñore kinjanqoqo sogokonj fukego. Qoqodure buño Grik

* **1:13:** Apo 19.21

manegobi eru qanda* goku yonoyanunde buñoji yayan miegobi, oi sosowo bapi ñabebemiñgo manego. ¹⁵ Oñu maneru Bobiañ Biñe oi Rom siti ñonore oñuakon mitaniñgabemiñgo afagaru joineke eego. Oñu.

Bobiañ Biñere usunñ oi iñi:

¹⁶ Anuture usunñi nonunñ sosowo qowirie nobeko damañ yoo Sombunde biñe fukegobeneñ. Juda niñoji rone mañnonunñ kerisieru oi manesiñ gabeneñ eru niñore ñadio kantri goine yonñoji oñuakonñ oi manesiñ garu mañyanunñ kerisiebuñ. Ore eru Anutuñi usunñine Bobiañ Biñeo ruako pega ore mimiganñanñ so eego.* ¹⁷ Bobiañ Biñeji posiine fukekiminde fune barariñga noreega. Biñe buño mo iñi quranñabi pega, “Posiine fukega, iñoji mamanesiñineji mañgo eteko sananñgaru go ropeiñ. Buño ore fune oi iñi: Niño Anutu funñgaru manesiñ gabeneñ mamanesiñnonunñ ñoneru buñononunñ mitariko posikebeneñ eru moreñgo gokiminde so jikigaru manesiñ gaku jiñoineo posiine fukeekimiñ.” Oñu.*

Noñunde agiburande ore Anuture mañ rigañgaega.

¹⁸ Soine posiine fukenobenñonñ, niñigo buño foriine eeboboyanunñi kejiñgaru jijibu baegobi, Anutuñi oi Sombunñgo paibeone piku ñoneme so sagako mañine rigañgaega. Niñigo oñuine sosowo

* **1:14:** Qanda, Webo buñoo bus kanaka, niñigo gomenggo yonoyonñe akonñ mutu goku mamane piyanunñ tomiri mo qanda gobun. * **1:16:** Mak 8.38 * **1:17:** Hab 2.4

ɲone yaberu wuwunɲayanɲ igoɲaru mosiyanɲ ɲembene ore eru rosiine barariŋga yareega. ¹⁹ Oi yoore eru: Anutire fuɲne mane mukukimiɲ ore so fukega, oi iɲoyoɲe barariŋga yareme botunonɲngo totogo akonɲ peko maneegobi.

²⁰ Anutire gogo so ɲoneegobenɲyon, usunɲine oi Sombunɲ moreɲ bofuke yaperu oone fuɲgaru noduru go wapeme damanɲ tatariine tomiri fukeru peega. Ore eru Anutire mequranɲ poretiɲ ɲonebenenɲ moreɲfuɲ kuririineke fukega ore fuɲine soine mane mukukimiɲ ore so fukega. Ore eru ɲiɲigoji ya mogo gbedigaru yonɲoyanɲunde buɲore mobeine kitiɲgaku miɲngo embimbiɲgaegobi. ²¹ Anutire fuɲne mane mukuru gobunɲyon, jibu “Iɲoji ofonɲonɲun,” onɲu so miku oi so miteɲ gabi tinabiɲeine botuyanɲngo so fukeya. Onɲu so fukeyayon, buɲo omaine kosabasa manesubi mamaneyanɲunji wirieko mutu fukebuɲ. Maɲ mamane-mukuyanɲun tomiri oiji dabu eme qisiri eko tintunɲ gogobi. Ore eru “Anutire fuɲne so manegobenɲ,” miku gbegbedi kosa ruabi so sagaga.*

²² “Maɲgboroɲ ɲiɲigo gogobenɲ,” miku sakiyanɲun ba ropeku gobunɲyon, onɲuine oo ɲiɲigo manyanɲun tomiri fukegobi. ²³ Anutu tinabiɲeine kuririquranɲineke damanɲ tatariine tomiri go ropeiɲ, oi so miteɲ gaku ohoweine so baku gobunɲyon, oi bokero nemu gbonɲ eru merofu sasako goine saribuɲ. Nemu gbonɲ pasikebi kamasiyanɲun ɲi komekiinere so fukegobi. Sasako goine babi webo, joma eru moreɲngo beuyanɲunji

* **1:21:** Ef 4.17-18

peperu raegobi, yoŋore so fukegobi. Yoŋoji oi daberu moreŋfuŋ ore so miteŋ yaberu gobuŋ.*

²⁴ Oŋu eru gobuŋ ore Anutuji oi ŋadi yabeko yoŋoyaŋunde mande aŋi sanaŋine kosa boyoberu boesau eku yoŋoyaŋunde saki mimigaŋgaŋ qaku baba waki eku gogobi. ²⁵ Anuture buŋo foriine bokeru tifeineo buŋo ikoineo qakatobuŋ. Bobofuke Rauine fofori so araŋ baku kiŋaŋine so qaku gobuŋyoŋ, ya bofukeya me yoŋoyaŋunde meji babuŋ, ore aŋiine fukeko maneru mequraŋ yoŋore ohowe baku miteŋ yaberu gobuŋ. Oŋuine gobuŋyoŋ, niŋoji bobofuke Raunoŋuŋ oi damaŋ tatariine tomiri miteŋ gaekimiŋ. Buŋo oi fofori.

²⁶ Oŋu eru gobuŋ ore Anutuji oi ŋadi yabeko yoŋoyaŋunde aŋi sanaŋine mimiineke oi kosa boyoberu iŋi ebuŋ: Yoŋore ŋigopuji ŋoe ŋonuŋ kadi poretiŋ bokeru yoŋoyone akon kerisieru rorobaba eku gobuŋ. ²⁷ Ŋi yoŋoji oŋuakon ŋigoke rorobaba eku gogo bokeru kasigabi. Boesau eniminde aniyaŋuŋ sanaŋine oi ŋi botuyaŋuŋgo popore eku manebi joineke fukeko yoŋoyaŋekon kerisieru rorobaba eku wuwunuŋyaŋuŋke fukeru gobuŋ. Kasigabi qaŋgoqasa gobuŋ ore geoine oi Anutuji soyaŋuŋgo bokirie yareme paiyaŋuŋgo ropeko sembeabuŋ.

²⁸ Anuture fuŋne mane mukukimiŋgo manebi wawakiine fukeme bokebi Anutuji oŋuakon oi ŋadi yabeko yoŋoyaŋunde mamananesu kekesiineji siŋaŋ yabeko eebobo mimiineke eba eku gobuŋ.

²⁹ Eebobo kekesiine eru mosi sembene fuŋne fuŋne oiji manyaŋuŋ puŋeko iŋi eegobi: Ya

* **1:23:** Dut 4.16-18

ebu eku no roinḡo sase eru sinefuru eegobi. Goine yoḡore yare anda eegobi. Niḡigo yabebe komeegobi. Kekepari baku goine eadu yabee-gobi. Niḡigo goine koḡkoḡ paiineo sembene eyarekiminḡo maneegobi. Niḡigo kajeyanḡo buḡo sanu ebi rakame gbiḡo pougaru raega.

³⁰ Ḥadiqoqo buḡo miegobi. Anuture kane miegobi. Mosi sembene joineke reḡgaru boyobeegobi. Jauba-irinḡirinḡ eru sakiyanḡu ba ropeegobi. Sakigo rua eru mosi sembene furuine furuine bofukeegobi. Maḡgomama buḡoyanḡu so reḡgaegobi.

³¹ Mamaneyanḡu so tinḡako manyanḡu tomiri goku buḡo kosa kiperu so boyobeegobi. Oogo so eru goine yoḡore beusembe so maneru rosi eyareegobi. ³² Anutuji kadi poretinḡ inḡi mitigame pega: Niḡigo sembene oḡuine baegobi, yoḡoji kome sananḡ qanḡanḡinere binḡe fukeniminde so fukegobi. Yoḡoji mimiti oi mane taniḡagobiyonḡ, jibu yoḡoyonḡe sembene oi eegobi eru oḡuakonḡ matayonḡ, goineji oḡu ebi oi “Soine!” miku qotikeru kitinḡ yareegobi. Oḡu.

2

Anutuji buḡononḡu osoeru poretinḡ akonḡ mitariega.

¹ O ogone, go goine yoḡore buḡo mitariego me mata? Go goine yoḡore buḡo mitariku gake eebobo oi akonḡ baega. Ore eru ogogore buḡo mo mitarige ine, gakere buḡo oḡuakonḡ mitarinde ore goineji gakere paio ropeinḡ. Ore eru ropekiine me wawakiine fukege, oi jibu ya mogo gbedigaru

gakere buñore mobeine kitingaku mimiñgo em-bimbiñgaege.* ² Nñjigo eebobo sembene oñuine eegobi, Anutuji yoñore buño buño foriinere so osoeru mitariega, oi manegobeneñ.

³ Ore eru uruñu manesukuge? Go moreñ ñi eku jibu ya oñuine eegobi, yoñore buño mitariku gake eebobo oi akon ende sagaga me mata? Anutuji buñogo osoeru mitariku geoine bokirie gareko foriine gore paio ropeiñ. Anuture jñoo so kamieru sumuñgamiñ.

⁴ Anutuji ogo enoreru sembenenoñunde geo pipa so bokirieiñyoñ, odigaru maneku karieega, buño ore mipemiriñ ege me? Anutuji beufiine noduru mañgo kerisiemiñ ore kepore guega, ore mutu egu gomiñ. ⁵ Go kajegi eru mañgo so kerisiemiñ ine, oñuine oo Anuture jñoo mimi-gañgañ so kamiemiñyoñ, yombeneñeji gore paio saue ropeiñ. Rosi damañeñeji ware fukeme buñonoñuñ poretiñ akon mitariñ. Geoine bokirie noreiñ, damañ oo yombeneñe totogo barariñga noreme ñoneru manekimiñ.

⁶ Anutuji “Eebobonoñunde so moakon moakon noñunde tife bokirie noreiñ,” oi iñi:* ⁷ Anutuji tinabiñeine noreiñgo odigaru kuririnoñunke fukekimiñgo yameñ keku damañ so dimaku gio fiine fiine baku gogobeneñ, noñunde gogo sanañine noreiñ. Oi noreko damañ tatariine tomiri señginbañgiñ go ropekimiñ. ⁸ Oñuine go ropekimiñyoñ, ñiñigo yoñoyañunde akon manesuku qoqeqawaki baku Biñe buño foriine ñadi gaku buño sembene yobeegobi, Anuture

* **2:1:** Mat 7.1; Luk 6.37 * **2:6:** Kiki 62.12; Qoq 24.12

manji ore eru rigangako yombenine ruako paiyanungo ropein. ⁹ Yombenine oi rone Juda ninjore paio ropeko ninjore ndio kantri goine eebobo sembene eegobi, sosowo yonjore paio onjuaon ropeko josereren sisikonkon maneru goniminj.

¹⁰ Onj goniminjon, Juda eru ninjore ndio kantri goineji onjuaon manyanun kerisieru eebobo fiine eegobi, Anuture kuririji sosowo nonjunde paio ropeko tinabine noreko womoo gokiminj. ¹¹ Anutuji njigo goine so none anj eyareku goine so sure yabeegayon, so moakonjo osoe nobeega.*

¹² Ore funjine oi inji: Kantri goine yonjosi Anuture Kadi bujo so osegaru maneru agiburan kosa baegobi, yonjosi sosowo mutu goku sibiriganiminj. Juda ninjosi Anuture Kadi bujo osegaru maneru jibu agiburan eegobenenj, Anutuji bujo ore so sosowo osoe noberu bujononun mitariinj. ¹³ Njigo Anuture Kadi bujo mo manee-gobi, yonjosi Anuture jinoo posiine so fukegobi. Matayon, Kadi bujo renjaru boyobeegobi, Anutuji yonjore bujo mitarime posikeniminj. ¹⁴ Kantri goineji Anuture Kadi bujo so roru gogobiyon, goineji jibu kosa yonoyanunde anj so manesuku eegobi. Anuture kadi bujo so manegobiyon, jibu mamanyaunji mitiga yareko Anuture kadi bujore so eru ore rurumanjo gogobi.

¹⁵ Onj gogobi ore funjine oi totogo fukeru inji pega: Anutuji njigo bofuke noberu oo Kadi

* **2:11:** Dut 10.17

buṅore mimiti oi sosowo noṅunde maṅgo ruame pega. Ore eru Anutuji buṅoine miku saṅu eega, oi kotu kantri yoṅoji oṅuakoṅ manee-gobi. Oi maṅyaṅunde kajeji manebi buṅoyaṅuṅ yajiko Anutuke sogokoṅ manee-gobi. Anutuji maṅmamane yareya, oiji damaṅ goineo buṅo koroineo ruaru bapakare yabeko mane sembeae-gobi eru damaṅ goineo buṅoyaṅuṅ kitingaku miko maneru fiaegobi. ¹⁶ Bobiaṅ Biṅe mitaṅgaego, ore so damaṅ yasogoo inṅi fukeiṅ: Kristo Yesuji Anutu bapi gako ṅiṅigo noṅunde buṅo sumuṅine sumuṅine osoeru mitari noreiṅ. Oṅu.

Kadi buṅo oiji fuṅnenonṅuṅ uruṅu barariṅga norega?

¹⁷ Go gake tina Juda ṅi oṅgaku Kadi buṅoji munaṅqoqo egareṅ ore manesiṅ garu “Anutуре biṅe fukego,” miku sakigo miteṅ gande sagaga me mata? ¹⁸ Go Anutуре mi so gogore buṅo mane sarigaru goge. Anutуре Kadi buṅo qaji garebuṅ ore eru kadi fiine yobu boyobeiṅgo miku buṅo sosowo osoeru foriine eru ikoine botuyakuṅgo boroṅgaege. ¹⁹ Go “Soine jṅokombi ṅiṅigo ogo babapiyaṅuṅ fukeru oga yabebemiṅ,” miku gake sakipepe eege. Qisirigo gogobi, oi bataniṅ yabemiṅ ore so koimo fukege.

²⁰ Oṅu fukeru inṅi miege, “Kadi buṅo qaji norebi mamane-muku bofukeru buṅo foriinere fuṅne mane forego.” Oṅu miku aṅgaru inṅi miege, “Noṅ soine ṅiṅigo mamanyaṅuṅ tomiri yoṅore qaṅaji fukebemiṅ. Soine odumade yoṅore qaṅaji fukeru qaji yareebemiṅ.” ²¹ Oṅu miku goine qaji yareru

wamore gake so qaqaji eege? “Kian so roigon,” miku njinigo manyanun bapakare yabeegeyon, gake kian bobo fukende so sagaga.

²² “Boesau so eigon,” onu yajinde manebunyon, gake boesau ege me mata? Nemu gbon musombe eyaregeyon, jibu gake boji soringo roperu ya sabareku baa baege. Oi so sagaga.

²³ Anuture Kadi bunoke goge ore sakigo jibu ba ropegeyon, gake oi kigaru onuine oo Anuture tinabine bawakiru eru gokande mimiineke fukeega. ²⁴ Ore bunoine oi Bine Qurango ini quranjabi pega, “Nonore mosinanunde eru kotu kantri kufufun yonoji Anuture tina igobi eku botuyanunjo igosisi eegobi.”*

²⁵ Anuture Kadi bunjo boyoberu goge ine, Anuture moge sakigoo ketigabun, oiji bapi guko sagaga. Oi sagagayon, kadi bunjo kigaru agiburan eege ine, mogeine ketigakiine mata kamasi onu fukeru omaine kosa goge. ²⁶ Goineji Anuture moge sakiyanunjo so ketigabi jibu kadi bunore mimiti boyobeegobi ine, Anutuji moge oi sakiyanunjo pega ore so none yabeme sagaga.

²⁷ Onuine none yabeme yonoreone moji soine Kadi bunore so gore bunjo akon osoeru mitarime wakiin. Anuture moge sakigoo ketigabi Kadi bunore qoru moakon moakon maneru sabareku gogeyon, oi kigaru agiburan eege ore eru wakiin.

²⁸ Ni moji sakiji akon Juda ni fukega ine, inoji Juda ni foriine so fukega. Onuakon Anuture moge sakiineo akon ketigabi qoqomuku eegobi ine, oi moge omaine, foriine tomiri.

* **2:24:** Ais 52.5

29 Foriine matayon, ni mo mañineji Juda ni fukega, inoji Juda ni foriine fukega. Onuakon Anutuji mañnoñon qopogaru Moroine Tiriine oo ruame goga, oiji moge foriine fukega. Kadi buñore qoru boyoberu ni sakiine ketigabi moreñ niñigoji manebi ropeegayon, Anutuji mogeine mañnoñonngo dimaga ore maneko ropeme miter nuega. Onu.*

3

Anutuji buñoine damañ so boyobeega.

1 Onu peko Juda niñigo gogobeney, buño oiji uruñu bapi nobena? Anuture moge sakinoñonngo ketigabuñ, ore foriineji uruñu fuke norega? 2 Foriineji gogo sosowo oo kokoine fukeru fori bapi nobeega. Ore buñoine funfunğaine oi inji: Anutuji Biñe buñoine noreko noñunde biñe fukeme gogobeney.

3 Onu gogobeneyon, noñundeone goineji Anutu so manesiñ gaku gobi uruñu eyarein? Qoqomuku gobuñ ore geoine bokirieru uruñu enorein? Manji jojokoine kiperu sabareko omaine fukein me uruñu? 4 Oi mata yobu! Noñuñ sosowoji niñigo ikoine fukegobeneyon, Anutuji foriine yobu fukega. Anuture funne oi Biñe Qurañgo inji qurañgabi pega, “Buño koroineo ruaru weu garebi buñogore tife mitañoñgaru oo poretiñ fukeru gbini eyareru dimaigon. Gore funnego onu bofukeru kitiñgaku minimiñ.”*

* 2:29: Dut 30.6 * 3:4: Kiki 51.4

⁵ Nononun eebobo kekesiine boyobebenen Anutuji qotinga nobeko oo eeboboino poretin oiji to-togo fukega ine, nononun buɔo ore urunu minoben? Non buɔo oi moren ninigo mamanoonunde so inji migo: Anutuji goine bokirieme yombenineji painonunngo ropega, injore mamaneji onu kasi-gaga me mata? ⁶ Mata, oi use! Anutuji kekesiine fukena ine, injoji kaeine kaeine nonunde buɔo urunu osoeru poretin mitarina?

⁷ Nonji ni ikoine fukebe Anutuji buɔoine foriine oiji botinga nareko injore tinabineji onu totogo fukega. Onu fukeko nonji agiburan ebon, Anutuji ore buɔoine urunure mitariga? Boke nuko nakene anigo gobe sagana me mata? Buɔoineji so wirieru wakiin. ⁸ Niɔo inji mibenen sagana, “Niɔo soine sembene jikigaru ebenen Anutuji oi botingako mosi finere foriji fukeko buɔoineji bineroroineke fukein.” Goineji injore buɔo rokaweru onu miku jikigaru inji miegobi, “Polji buɔo onu miku ore so kosa eega.” Onu eru mibun ore buɔoine oi Anutuji osoeru soyanunngo mitari yarein, oi manego. Onu.

Ninigo moji posine so fukega.

⁹ Buɔo onu mimane eku oi urunu mitarinoben? Juda ninoji kantri goine yadureru Anuture jinoo poretin fukegobenen me mata? Mata yobu! Ore buɔoine ronekon inji misanangaben: Juda me kantri goine fukenenen, nononun sosowo agiburan ebenen qukarie nobeko gogobenen. Ore eru sakinononun ba ropekimingo embimbingaegobenen. ¹⁰ Ore buɔoine oi Biɔe Quraɔo inji quraɔabi pega,

“Moji mo posiine poretiŋ so yobu fukega.*

11 Monde maŋgo mamane so fuke taniŋgako kosa gogobi. Moji mo Anutu bofukeiŋgo ore so yameŋ keega.

12 Matayoŋ, sosowoji kadi odureru jijibu gogobi. Sosowoji sembearu Anuturo jiiŋoo wuwununyaŋŋke fukegobi. Fiine fukeega, moakoŋ mo oi so yobu bofukego.

13 Namaŋyaŋunji sinefuru eegobi.

Nomeguyaŋunji jiiŋorunde yoŋ oŋuine aŋgaru dimako komere mumu oŋuine oiji ŋiiŋigo kosa sibiri yabeegobi. Buŋo sembene oi qotire mi orabeŋ nombe oŋuine miyaŋuŋgo puseru peko miyaŋunji ŋiiŋigo kosa kiyabeegobi.*

14 Buŋo mokiine soweinekeji mi bibiyaŋuŋ puseko ŋiiŋigo kosa qaiso yareegobi.*

15 Ŋiiŋigo kosa yaberu dariyaŋuŋ koŋganimiŋ ore kufuyaŋunji suronqoqo pipa ra wareegobi.*

16 Eeboboyaŋunde fuŋne kesigako gogobi ore soiyaŋuŋ iŋi fukega: Uro uro roregaegobi, oo ketoqototie ebi ŋiiŋigo maŋyaŋunji sembearu jajabaega.

17 Womoo gogore fuŋne oi so mane mukugobi.

18 Anutu araŋ batekiminde buŋo oi maŋyaŋuŋgo so pega. Miine egu odureniminde kokoi so maneru mo kosa gogobi.”

Anuturo buŋo oŋu pega.*

* **3:10:** Kiki 14.1-3; 53.1-3 * **3:13:** Kiki 5.9; 140.3 * **3:14:** Kiki 10.7 * **3:15:** Ais 59.7-8 * **3:18:** Kiki 36.1

19 Anutuji Kadi buño yoore eru noreya, oi manegobeneŋ: Kadi buño sosowo oiji moreŋ so kipe nobeega. Noŋuŋ buño ore rurumaŋgo raru reŋgaru gobeneŋ sagaiŋ. So reŋgakimiŋ ine, Anutuji geoine bokirie noreko sibirigakimiŋ. Ore eru sombuŋoŋuŋ maneru gbegbedinoŋuŋ bokero buŋonoŋuŋ bokeko goku reŋga tebeneŋ sagaiŋ. Anutuji ŋiŋigo fuŋnenonoŋuŋ oŋu barariŋga noreko pega.

20 Kadi buŋoji kipe nobeegayoŋ, niŋo sosowo oi boyobekimiŋ ore embimbiŋgaegobeneŋ. Anuture Kadi buŋoji agiburaŋnoŋuŋ ba taniŋgako ŋoneru soine mane mukukimiŋyoŋ, kadi oo Anuture jiŋoo posiine fukekimiŋ ore embimbiŋgakimiŋ. Oŋu.*

Posiine fukekiminde fuŋne oi mamanesiŋ.

21 Niŋonoŋe embimbiŋgaegobeneŋyoŋ, Anutuji Kadi buño boyoberu posiine fukekimiŋ ore oi so miyayoŋ, kadi furuine iŋi burugaru miko pega: Anutuji iŋoyoŋe buŋonoŋuŋ mitarime iŋore jiŋoo posikekimiŋ. Anutuji buño oi Moses eru kajeqouŋ ŋiŋigo yoŋore barariŋga yareko kitiŋgaku miku Biŋe Quraŋgo quraŋgabi damaŋ yoo totogo fukeko manegobeneŋ.

22 Ore eru oone me oone noŋuŋ Yesu Kristo manesiŋ gagobeneŋ, Anutuji sosowo noŋunde buño mitarime posikekimiŋ. Niŋigo kubu furuine furuine noŋuŋ Anuture jiŋoo sogokon

* **3:20:** Kiki 143.2; Gal 2.16

fukegobenenj.* ²³ Njĩgigo sosowo nonũũ agiburaŋ eku Anutũre kuririqurande eru embimbĩngagobenenj.

²⁴ Oi embimbĩngagobenenjyũ, Anutũre yaũmũririji fukeko Kristo Yesuji duenoũũ baya. Anutuji yaũũ ore eru buũonoũũ mitarime posikekimĩj. ²⁵ Rone agiburaŋ eru gobuũ, Anutuji oi mane karieru geoine pipa so bokirie yareya. Oi so bokirie yareru iũoyũũnde eebobo posiineji totogo fukeiũ ore maneru Kristo Yesu boji joma oũũine fukeme qabi komeko Anutũre jĩũũ ke keririke noĩeũ ore fuũine fukeya. Dariine koũgaya, oi manesiũ gabeneũ oũũine oo agiburaũũnoũũ jureru bokeme posikekimĩj. ²⁶ Fuũine oi damaũ yoo totogo fukeiũ ore maneru Yesu oũũ eteya. Anutũre eebobo posiine oi iũi: Iũoyũũe posiine fukega eru moji Yesu manesiũ gaga, iũore buũũ mitarime posikeega.

²⁷ Oũũ fukeko wamũre sakinoũũ ba ropenobey? Ya more ore eru oi mata yobu. Kadi buũũ boyoberu posiine fukekimĩj ore oi embimbĩngagobenenj. Oũũ oo posiine so fukekimĩjyũ, Yesu manesiũ gabeneũ Anutuji ŋone noberu buũonoũũ mitarime posiine fukeekimĩj. ²⁸ Buũũ yo mitariku korũũine iũi misanaũgobenenj: Kadi buũũ boyobeegobenenj ore matayoũ, Yesu manesiũ gagobenenj ore eru Anutuji buũonoũũ mitarime posiine fukeekimĩj. ²⁹ Anutuji Juda niũore Anutu akoũũ so fukega. Iũũ kantri goine yoũore Anutu oũũakoũũ fukega me mata? O yoũore Anutu oũũakoũũ

* 3:22: Gal 2:16

fukega.

³⁰ Anutuji moakon fukega. Ore eru sakinoŋun ketigabi gogobeneŋ, niŋoji manesiŋ gabeneŋ bofosike nobeega eru sakiyaŋun so ketigabi gogobi, oi oŋuakon manesiŋ gabun ore eru bofosike yabeega.* ³¹ Manesiŋ ganiminde buŋo miku oiji bapakare yaberu oŋuine oo Kadi buŋo bawaki ruabeneŋ omaine fukeiŋ me mata? Oi use matayoŋ, Anutire Kadi buŋo oi so kepieegobeneŋyoŋ, oi basanaŋgagobeneŋ. Oŋu.

4

Abrahamji Anutu manesiŋ garu posiine fukeya.

¹ Niŋo miminenoŋun Abrahamde fuŋnere uruŋu mikimiŋ? Inoji Anutire fuŋne uruŋu bofukeru iŋore jiŋoo posiine fukeya? ² Fofori, Anutuji iŋore buŋo oi eeboboine fiinere eru mitarime posikenobeŋ ine, iŋoji ore eru soine sakiine ba ropenayoŋ, oi Anutire jiŋoo mata. ³ Ore buŋoine oi Biŋe Quraŋgo iŋi quraŋgabi pega, “Abrahamji Anutu manesiŋ gako mamanesiŋine ŋoneme sagako buŋoine mitarime posikeya.” Buŋo oŋu pega.*

⁴ Buŋoine oi yaun mitarime posikeyayoŋ, moji gio bako siŋaŋineji furiine yaun matayoŋ, gio baega ore so ŋoneru osoeru furiine oteega. ⁵ Moreŋ siŋaŋi oŋu oteegayoŋ, Anutuji wuwunun ŋiŋigo noŋunde buŋonoŋun mitarime posiine fu-keekimiŋ. Ore eru moji senŋiŋbaŋiŋ fukeiŋgo

* **3:30:** Dut 6.4; Gal 3.20 * **4:3:** Jen 15.6; Gal 3.6

ore gio so baku Anutu mo manesiŋ gaga, Anutuji mamanesiŋine oi ŋoneko sagako buŋoine mitarime posikeyiŋ.

⁶ Deiwidji oŋuakon buŋo ore fuŋine kitiŋgaku buŋo iŋi barariŋga noreru miya, “Moji seŋiŋbaŋgiŋ fukeiŋ ore gio so bame Anutuji mamanesiŋine ŋoneme sagako buŋoine mitarime posikeya, iŋoji kiwaqawaineke fukega.” ⁷ Oŋu miko buŋoine oi iŋi quraŋgabi pega, “Niŋigo Kadi buŋo kigabi Anutuji agiburanyaŋuŋ bokeru keririkeme gogobi, yoŋoji kiwaqawaineke fukegobi.*

⁸ Ofonji more agiburaŋ jureru ŋoneme sagako geoine paiineo so ruame ropeiŋ, iŋoji seŋiŋbaŋgiŋineke fukega.”

Buŋo oŋu pega.

⁹ Anutuji seŋiŋbaŋgiŋ fukekiminde fuŋne oŋu barariŋga noreru Anuturo mogenoŋuŋke niŋore akon miko pega me mata? Oŋu mata. Oi kantri goine mogeyaŋuŋ tomiri yoŋore oŋuakon pega. Niŋoji iŋi miku quraŋga foregobeneŋ, “Abrahamji Anutu manesiŋ gako mamanesiŋine ŋoneme sagako buŋoine mitarime posikeya.”

¹⁰ Iŋo wamo damaŋgo ŋoneko sagako buŋoine mitarime posikeya? Anuturo moge sakiineo ketigabi goya, damaŋ oo matayoŋ, rone mo goya, Anutuji damaŋ oo mamanesiŋine ŋoneme sagako buŋoine mitarime posikeya.

¹¹ Rone omaine goku Anutu manesiŋ gako buŋoine mitarime posikeya. Ore ŋadio sagaya ore mogeine oi sakiineo ketiganiŋiŋ ore miko moge

* **4:7:** Kiki 32.1-2

soiine oṅuine fukeya. Oṅu fukeko iṅore ṅadio Anutire mogenoṅuṅke so goku manesiṅ gabeneṅ mamanesiṅnoṅuṅ ṅoneme sagako buṅonoṅuṅ mitarime posikekimiṅ, Abrahamji sosowo noṅunde miminenonoṅuṅ fukeya.* ¹² Miminenoṅuṅ iṅoji omaine goku damaṅ oo maṅine kerisieru Anutu manesiṅ garu goya, niṅo mogenoṅuṅke iṅore so eru gogobeneṅ. Anutire mogenoṅuṅke goku maṅnoṅuṅ kerisieru gogobeneṅ, niṅore miminenonoṅuṅ oṅuakoṅ fukeya. Moge keti nobebi omaine kosa so gogobeneṅyoṅ, Abrahamde kufu kadi boyoberu manesiṅ gaegobeneṅ. Oṅu.

Anutire jojofo buṅo manesiṅ gabeneṅ foriineke fukeiṅ.

¹³ Anutuji Abraham moreṅ biṅe qa teme rauine fukeko osigidapuineji iṅore ṅadio oṅu go ropeniminde buṅo mikipeya. Buṅo oi Kadi buṅo boyobeya ore eru so ojiyayoṅ, Anutuji mamanesiṅine ṅoneme sagako buṅoine mitarime posiine fukeya ore buṅo oi ojiya.*

¹⁴ Goineji seṅgiṅbaṅgiṅ fukekimiṅ ore Kadi buṅoo qakatoru oṅuine oo Anutire ya oi biṅe qoqo enimiṅ ine, yoṅoji mamanesinde buṅo kepiebi omaine fukena. Oṅu Anutire jojofo buṅore so embimbiṅgabeneṅ buṅo oiji omaine egu fukeiṅ.* ¹⁵ Anutire Kadi buṅo kigabeneṅ maṅine rigaṅgako rosiineji painoṅuṅgo ropeegayoṅ, Kadi buṅo so pena, oṅu agiburande buṅo so minobeṅ.

* **4:11:** Jen 17.10

* **4:13:** Jen 17.4-6; 22.17-18; Gal 3.29

* **4:14:** Gal 3.18

16 Abrahamji oṅu qodure noreru sosowo noṅunde miminenonṅuṅ fukega. Ore eru jojofu buṅoine noreya, oi Kadi buṅoo qakatoegobi, yoṅore akonṅ matayonṅ, Abrahamji mane siṅgaya, oṅuine manesiṅ gabeneṅ noṅunde oṅuakonṅ foriineke fukeiṅgo maneya. Ore eru Anutuji jojofu buṅoine oi iṅi burugaru ruaya: Oi manesiṅ gabeneṅ foriine sosowo noṅunde yaunṅ noreko yaunṅmoririineji totogo fukeega.*

17 Abrahamde buṅo mo oi Biṅe Qurango iṅi qurangabi pega, “Nonji go bapakare gube niṅigo kufufuṅ kokoine yoṅore mamayanṅuṅ fukemiṅ.” Buṅo ore so Abrahamji Anuture jiṅoo mama enoreega. Anutuji komekiine bogbore yabeega. Kufufuṅ gogoyanṅuṅ tomiri, oi jiṅoke gogobi ore kamasi oṅuine oṅga yareko fukeegobi. Abrahamji Anutu oṅuine manesiṅ gaya.*

18 Anutuji rone Abrahamde iṅi ojiya, “Gore osigidapugoji fukeru sauebi jareyanṅuṅ bobuṅ oṅuine fukeme gonimiṅ.” Jojofu buṅo oi maneru uruṅu foriineke fukena, oi so maneyayonṅ, oi jibu oori eru niṅigo kufufuṅ kokoine yoṅore mama fukeiṅgo odigaru goya. Jojofu buṅo fuṅfuṅgainere so fukeiṅ ore Anutu manesiṅ gaku goya.* 19 Sarare woruṅineji odumade rorore so, so fukeme iṅoyonṅ gosaine 100 ore so go wapeya. Ore eru iṅoyonṅ manesuko ni pogo sakinine mujugaru gbanikine fukeyayonṅ, jibu Anuture buṅoji foriineke fukeiṅ ore manesiṅ gaku gokame Abrahamde mamesiniṅi so gbanjiru wirieya.*

* 4:16: Gal 3.7 * 4:17: Jen 17.5 * 4:18: Jen 15.5 * 4:19: Jen 17.17

²⁰ So wirieyayon, buņoineji foriineke fukein ore manesin garu oo sanangaru dimaya. Anutire jojofu buņo ore maņineji roqo wareqo so eyayon, mamananineji sanangako Anutu miteņ gaku gokame Anutire tinabineji saueya. ²¹ Anutuji ya fukeinde buņo miku kiperu oi ba foreinigo sanangaega, oi mane sananga foreru manyoka mo so eku goya. ²² Onu eku goya ore Anutuji Abrahamde mamananin noneme sagako buņoine mitarime posikeya. ²³ Mamananine noneme sagako buņoine mitarime posikeya, buņo oi Abrahamde akon so qurangabi pega.

²⁴ Abrahamde akon matayon, nonunde ore eru onuakon oi qurangabi pega. Nonun Ofonononun Yesu bogboreme komegone pakereya, Anutu onuine manesin gabeneņ mamananinonun noneme sagako mitari noreko posikekimin. ²⁵ Anutuji nonunde agiburande ore eru Yesu so sabareko komeko eru posiine fukekimin ore eru bogboreme komegone pakereru goga. Onu.*

5

Anutire jinoo posikeru jerieru womoo gogobeneņ.

¹ Nonun Anutu manesin gabeneņ buņononun mitarime posikegobeneņ. Ore eru Ofonononun Yesu Kristoji mango enoreko Anutuke womo bofukeru gogobeneņ. ² Onuakon Yesu Kristo manesin gabeneņ mango enoreko yaunmoriri bine qoqo ekiminde fune bofukeru daman yoo yaunmoriri mango gogobeneņ. Anutire

* 4:25: Ais 53.4-5

kuririquran mango ropenimiŋgo oori eru jerieegobeneŋ.

³ Ore akon so jerieegobeneŋyon, konkon maneru ore eru onuakon jerieegobeneŋ. Konkon mane karieru onuine oo yamenyamen bofukekimin. Oi maneru ore eru jerieegobeneŋ.

⁴ Yamen keku eesoigo sanangaru dimakimin. Eesoigo sanangaru dimabeneŋ oorinoŋunji sanangaein.

⁵ Anutuji Moro Tiriine rua noreko kadi fukeme manjokoine kesieko manŋonunŋo rakame gogobeneŋ. Ore eru oori eru senŋinbanŋin fukekimin ore eru odigaru mimiganŋan so bofukekimin.

⁶ Ore fuŋine oi inŋi: Nonun rone wiriine tobirinoŋun tomiri gobeŋ, Kristoji daman poretin oo akon komeru ninigo wuwununŋonunŋke nonunde due baya. ⁷ Moji Kadi bunŋo poretin boyoberu poretin fukega, ogoine onuine moji soine so komena? Oi maneko embimbanayan, moji manjijojoko kokoine ninigo eyareega, ogoine moji inŋore eru soine sakiine kisingaru komeinŋo manena.

⁸ Ninigoji onuine egobeneŋyon, Anutuji manji jojoko noreega, inŋoji oi inŋi noduya: Inŋoji Kristo soreme wakiru rone wuwunun ninigo gobeŋ, daman oo akon nonunde ore eru komeya.

⁹ Komeko daman yoo dariineji jureru mitari noreko posikeru gogobeneŋ. Jibu oi wawakiine onuine fukeme foriineji jiki inŋi fukein: Anutuji agiburande manjo totogo yaduko ya mokiineke morenŋo fukein. Oi fukeko Anuture jinoo posiine fukegobeneŋ ore Yesuji yombeŋ oone bomuku nobeko senŋinbanŋin bofukekimin.

¹⁰ Nonuŋ rone Anuturre rosipu goben, daman oo inoyonunde Made soreme komeru inoji furinonun fukeme Anutuke oogo fukeben. Fukeben, oiji muraŋine fukegayon, foriineji jiki ini fukein: Furinonun ruame Anuturre ogopuine gobenen Yesuji sananŋaru goga ore afagaru bomuku nobeko seŋinbanŋin bofukekimin. ¹¹ Ofonononun Yesuji Anuturre munanqoqo gio bame Anutuji furinonun bame inoke oogo fukeben, onuakon matayon, fofori Anutuke manjoko nadunŋadun eku dimaku kokorian eru jerieegobenen. Onu.

Adam inore eru komebenyon, Kristore eru gborekimin.

¹² Ni moakonji agiburan morengo kesueko fukeya. Anutuji agiburande geo ruame kome fukeya. Ore so ninigo sosowoji agiburan eru gobenen komeji ore so ninigo sosowo saga nobeko gogobenen.* ¹³ Rone Kadi bunjo so fukeme daman oo onuakon agiburan totogo fukeru eforeyayon, Kadi bunjo so peko agiburande bunjo oi so miku osoeru kosa gobun.

¹⁴ Adamde daman gone funŋaru kosa go wapebi Mosesre damanjo Kadi bunjo fukeya. Ninigo daman botuineo oo agiburan ebunyon, Adamji kadi kigaya, ore so akon so kigaru gobunyon, komeji jibu oi onuakon sinan yabeko gobun.

Adam, ni funfunŋaine inoji ni mo wareinde soso fukeya.

¹⁵ Sosoine fukeyayon, funneyakun oi sogokon so fukegobire. Adamji Kadi bunjo kigaru wakiko agiburan fukeru saueru ninigo kokoine saga

* 5:12: Jen 3.6

yabeme komeru gobuŋ. Oi komere fuŋne fukegayoŋ, senŋinbaŋŋiŋ fukekiminde fuŋne oi mo. Oi iŋi: Ni moakoŋ Yesu Kristo iŋoji maŋgo enoreru yaunmoririine barariŋga noreko Anuture yaunji totogo fukeru niŋigo kokoine sagaru isiri nobeya. ¹⁶Jikigaru iŋi mibemiŋ: Kadi yoyoka oi sogokoŋ so fukegobire. Ni moakonji agiburaŋ eko Anutuji buŋoine mitarime agiburaŋ niŋigo sosowo noŋuŋ misi korure biŋe fukebeŋ. Oi moreŋ nire fuŋne fukegayoŋ, Sombuŋ nire fuŋne oi mo. Oi iŋi: Damaŋ kokoine Anuture Kadi buŋo kigabeneŋ yaunine noduru mitari noreko posiine eegobeneŋ.

¹⁷ Oi moke mibemiŋ: Ni moakonji Kadi buŋo kigaru kome kesueko niŋigo sosowo komeru gogobeneŋ. Adamde agiburande eru komeji sosowo sagaru siŋaŋ nobeko kosa gobeŋ. Oi kadi wakiŋoŋoine fukegayoŋ, Anutu usunde fuŋne oi iŋi: Niŋigo noŋuŋ posiine fukekiminde yaun oi boakoŋ yobu biŋe ŋoŋo eku yaunmoririinere maŋgo gogobeneŋ, noŋuŋ senŋinbaŋŋiŋ bofukekiminŋ. Ni moakoŋ Yesu Kristo iŋoji kitiŋgaku dobe nobeko ŋonemeŋoti oŋuine sanaŋgaru go ropekiminŋ.

¹⁸ Moke jikigaru mibemiŋ: Ni moakonji Anuture Kadi buŋo kigaru wakiko Anutuji buŋoine mitarime niŋigo sosowo noŋuŋ misi korure biŋe fukebeŋ. Oŋuakoŋ ni moji posiine fukekiminŋ ore kesueko maŋnoŋuŋ kerisiebeneŋ Anutuji soine niŋigo sosowo noŋunde buŋonoŋuŋ mitarime posikeru sanaŋgaru go ropekiminŋ. ¹⁹ Oŋuakoŋ moke mibemiŋ: Ni moakonji ŋoŋomuku eru ag-

iburan qoru eteko saueme n̄n̄igo boakon̄ non̄un̄ kerisieru agiburan̄ n̄n̄igo fukeben̄. On̄uakon̄ n̄i moji Anuture mi ren̄garu agiburan̄non̄unde furi bame kadi fukeko Anutuji n̄n̄igo boakon̄ non̄unde bun̄onon̄un̄ mitarime posikekimin̄.

²⁰ Rone omaine kosa go wapebun̄yon̄, Mosesre daman̄go Anutuji Kadi bun̄o n̄n̄igo agiburan̄yan̄un̄ mane mukunimin̄ ore jikiga yareya. Oi jikiga yareyan̄on̄, oi manebi agiburan̄yan̄un̄ji sauere totogo fukeya. On̄u fukeme Anutuji yan̄moririine on̄uakon̄ basaueme agiburan̄ odureru fukeya.

²¹ Agiburande usun̄ oi yasogo. Ore eru agiburan̄ ebenen̄ oiji sin̄an̄ nobeko komekiine fukeru go wapeben̄. Anuture yan̄moriri oiji on̄uakon̄ usun̄ineke fukega. Yesu Kristo Ofon̄non̄un̄ji posikekimin̄ ore kesueko Anutuji bun̄onon̄un̄ mitarime poretinḡaru gogo sanan̄ine bofukeru daman̄ tatariine tomiri go ropekimin̄. On̄u.

6

Agiburan̄ n̄adi gaku Kristoke gboreru gonimin̄.

¹ Anutuji yan̄moririine noreko sauein̄ ore agiburan̄ jikigaru eru gokimin̄ me mata? Ore eru urun̄u mikabenen̄ sagain̄? ² Agiburan̄ oi use! Niño agiburande nigin̄gone n̄eririkeru man̄non̄un̄ ran̄gbaineji qon̄gbun̄ on̄uine fukeme agiburan̄ ekimin̄ ore useru gogobenen̄ ine, urun̄ure agiburan̄ji jikigaru sin̄an̄ nobeko gonoben̄?

³ Bun̄o yo manegobi me mata: Non̄un̄ sosowo Kristoreo qakatokimin̄ ore eru miti meso rau norebun̄. Oo man̄non̄un̄ ran̄gbaineji Yesu qabi

komeya ore kamasi komeko gokimiŋ ore miti meso oi rau nobebuŋ.

⁴ Mamaji kuririquaŋine noduru Kristo bogboreme komegone pakereya, noŋunde manji oŋuakoŋ gboreko gariine fukeru gobeneŋ sagaiŋ. Mamanoŋunji noŋuŋ Kristore kamasi oŋuine gboreru pakereru eebobo gariine eba eku gokimiŋgo manega. Ore eru miti meso oi yoore eru rau norebuŋ: Maŋnoŋuŋ raŋgbaineji Yesuke moko komeru peiŋ ore maŋnoŋuŋ raŋgbaŋine oi oŋuine yaŋgabuŋ.*

⁵ Maŋnoŋuŋ raŋgbaineji Kristoke sogokoŋ komeko oo iŋoke qakatoru gogobeneŋ ine, Mamanoŋunji noŋuŋ oŋuakoŋ Kristoke dimakiminde manega. Kristoji komegone pakereya, iŋore kamasi sogokoŋ gboreru gobeneŋ sagaiŋ. ⁶ Maŋ sakire aninoŋuŋ sanaŋine sembeneji agiburaŋ ekimiŋ ore sase eega, Anutuji aŋi oi ketotieme rakaiŋgo maneega. Anutuji agiburaŋi jikigaru siŋaŋ nobeko kiŋaŋine qaku gokimiŋgo so manega. Ore eru maŋnoŋuŋ raŋgbaŋine oi Kristoke maripoŋgo qame komeya. Ore so gogobeneŋ, oi manegobeneŋ.

⁷ Monde maŋine raŋgbaineji komeko iŋoji ag-iburande niginŋone ŋeririkeru goga. ⁸ Maŋnoŋuŋ raŋgbaineji Kristoke komeya ine, oŋuakoŋ iŋoke gboreru goku sanaŋgakiŋgo manesiŋ gagobeneŋ.

⁹ Oŋu manesiŋ garu Kristore fuŋne iŋi peko mane mukugobeneŋ: Anutuji oi bogboreme komegone pakereru goku sanaŋgaru moke so

* **6:4:** Kol 2.12

komeiṅ. Komeji oi so jikigaru siṅaṅ gako go ropeiṅ. ¹⁰ Kome komeya, oṅuine oo daman moakonṅ oo agiburande usuṅ ketotieme daman tatariine tomiri wiriine pe ropeiṅ. Gogo sanaṅine goga, oi Anuture go ropeiṅ. ¹¹ Goṅgbuṅ yoṅoji agiburaṅ enimiṅ ore embimbiṅanimiṅ. Noṅo oṅuakonṅ noṅo-ṅaṅunde manebi qoṅgbuṅ oṅuine fukeme Kristo Yesuke qakatoru dimaku Anuture sanaṅaru goinebi.

¹² Sakiṅaṅuṅ komeiṅ, ore aṅi sanaṅine sembeneji siṅaṅ ṅabeko oi reṅgaru agiburaṅ egu enimiṅ ore oi kiperu goinebi. ¹³ Ore eru saki tifeṅaṅuṅ sosowo oi agiburaṅ Rauinere meo so ruainebi. Raru oṅu ruabi biṅeine fukeko qoru eteko wuwunuṅ egu fukeiṅ. Oṅuine matayoṅ, komegone gboreru noṅo-ṅaṅe Anuture meo ru-rua einebi. Saki tifeṅaṅuṅ sosowo oi Anuture meo ruabi biṅeine fukeko maṅgo eteko ee-bobo posiine fukeeiṅ. ¹⁴ Noṅo Kadi buṅo ruru-ruṅgo matayoṅ, yaṅmoriri maṅineo gogobi. Ore eru agiburaṅji omaine kiperu siṅaṅ ṅabeko egu goinebi. Oṅu.

Posiine gogore Raure kiṅaṅ qaku goinebi.

¹⁵ Ore eru uruṅu minobeṅ? Noṅuṅ Kadi buṅo ruru-ruṅgo matayoṅ, yaṅmoriri maṅineo goku agiburaṅ ebeneṅ sagaga me mata? Oi use! ¹⁶ Rau yoyoka fukegobire. Noṅo-ṅaṅe yokoreone more meo ruru eku miine reṅgaru kiṅaṅine qaegobi, ore eru buṅo yo mane mukuinebi: Noṅo mo miine reṅgaegobi, iṅore kiṅaṅqoqopu fukegobi. Agiburaṅ Rauinere kiṅaṅqoqopu fukegobi ine, iṅoji oga ṅabeme kome sanaṅine komenimiṅ.

Anuture mi reŋgaru kiŋaŋine qaegobi ine, iŋoji buŋoŋaŋuŋ mitarime posiine fukeru go ropen-imin.

¹⁷ Nŋoŋo rone agiburaŋ Rauinere kiŋaŋqoqopu fukeru gobuŋ. Oŋu gokabi Biŋe buŋoji botin ŋabeeiŋgo qaji ŋarebi manebuŋ. Oi maneru ore so maŋ-ŋaŋuŋ kerisieru damaŋ yoo Biŋe buŋo poretin reŋgaru Anuture kadi boyobeegobi. Oŋu maneru ŋoŋore eru “Anutu danŋe!” miku gogobeneŋ. ¹⁸ Oi boyoberu agiburande nigiŋgone ŋerikeru Anuture kiŋaŋ qaku eebobo posiine eba eku gogobi.

¹⁹ Maŋsakiŋaŋuŋ wiriine fukega ore eru buŋo ore fuŋine oi moreŋ ŋiŋigo noŋunde buŋo mimore so nonji inŋi mibemin: Nŋoŋo rone saki tifeŋaŋuŋ sosowo useru jauba Rauinere (Satande) meo ruaru kiŋaŋ qa gobuŋ. Oŋuine gokabi eebobo wuwunuŋineke fukeru maŋ-ŋaŋuŋ kejiŋako gobuŋ. Oŋuine gobuŋyoŋ, damaŋ yoo saki fu tifeŋaŋuŋ sosowo oi useru Anuture meo ruainebi. Oŋu ruaru kiŋaŋ qabi eebobo posiine fukeko gbagbataeŋine fukeeinebi.

²⁰ Nŋoŋo agiburaŋ Rauinere kiŋaŋqoqopu gobuŋ, damaŋ oo eebobo posiine oi so boyobebuŋyoŋ, ŋoŋo-ŋaŋunde aŋigo kosa gobuŋ. ²¹ Damaŋ yoo eebobo ore mimiŋaŋuŋ manegobiyon, damaŋ oo oŋu eru goku foriine uruŋu bofukebuŋ? Eebobo mimiineke ore foriine oi kome sanaŋine.

²² Damaŋ yoo Anutuŋi agiburande nigiŋgone pirue yabeme ŋerikeru Anuture kiŋaŋqoqopu fukebi foriine fukeko gbagbataeŋine fukeegobi.

Oŋu fukeru gogo sananine goku tatariineo senŋinbaŋin bofukeru go ropenimin. ²³ Agiburaŋ ebeneŋ Rauineji furi noreko kome sananine bofukekiminyon, Anuture yaun oi senŋinbaŋin gogo. Kristo Yesu Ofonnonunke qakatoru dimakimin ine, sananŋaru tatariine tomiri go ropekimin. Oŋu.

7

Noe nonun gogore soso buŋo

¹ O maŋkekerisie ogopune, nono Kadi buŋo manegobi ore so inŋi naŋibemin: Kadi buŋoji nŋinigo kipe nobega. Morenŋo go ropekimin ore so ore yukuineo gokimin, nono oi manegobi me mata?

² Ore sosoine mo oi inŋi: Kadi buŋoji nŋo noeineke kipeme nŋi goin ore so noe nonun gonimiyon, noeineji komein ine, nonunineji noe nonun gogore Kadi buŋoone neririkein.

³ Ore eru noeineji sakike gome ni more Oŋ miko roin ine, inore tina jikiboti nŋo miegobeneŋ. Oŋu miegobeneŋyon, noeineji komein ine, Kadi buŋo oiji so jikigaru kipeme goin. Oŋuine goku ni mo roin, inoji jikiboti nŋo so fukein.

⁴ Ore eru maŋkekerisie ogopune, nonore fuŋneji oi onuakon pega. Nono onuakon ni more bine fukemin ore Kristoke qakatobun. Anutuji oi bogboreme komegone wapeko gogononunji foriine Anuture bofukeme fukein ore maneege. Kristoji komeko maŋ-naŋun ranŋbaineji inoke komeko qonŋbun onuine fukeru Kadi buŋore bine so gogobi. ⁵ Rone maŋ sakire anŋi sananine sembeneji sinan nobeko kosa gobeŋ. Daman

oo Kadi buṅoji boburoru bapakare nobeko agiburaṅ ekiminde aṅinoṅuṅ sananjine sembeneji fukeru siṅaṅ nobebuṅ. Ore eru maṅ sakinoṅunji pakere me gogonoṅunji kome sananjine fori bofukeru kosa gobenṅ.

⁶ Oṅuine gobenṅoṅ, rone buṅo oiji kipe nobeko witiineo goku kadi buṅore qoru moakonṅ moakonṅ boyobekimiṅ ore yameṅ keku gioine baku gobenṅ. Kristoke qakatoru dimabeneṅ maṅnoṅuṅ raṅgbaineji inoke komeko damaṅ yoo kadi buṅore biṅe fukebenṅ oone ṅeririkeru moke kiṅaṅine so qaegobeneṅ. Damaṅ yoo fuṅnenonṅunji gboreko Moro Tiriineji dobe nobeko afagaru Anuture gio baegobeneṅ. Oṅu.

Agiburaṅ egu ekimiṅ ore yameṅ keku jogbasasanaṅ eegobeneṅ.

⁷ Ore eru uruṅu minobeṅ? Kadi buṅo inoyone agiburaṅineke fukega me mata? Oi use! Kadi buṅoji agiburande fuṅne nadume manebonṅ. Kadi buṅo mo inṅi pega, “More yare so sase eigoṅ.” Oṅu so mina ine, nonṅi yare sase eego, ore fuṅine so mane mukunobo. Ore eru Kadi buṅo so mane mukunobo, oṅuine agiburaṅ so mane mukunobo.*

⁸ Kadi buṅo so pena, agiburaṅji buṅo omaine eru komiine fukena. Oṅuine fukenayoṅ, mimiti buṅo manebe dobu kipe nuko oi kigabemine fuṅne fukeko agiburaṅ ebe fukeya. Mimiti buṅoji bapakare nuko maṅne pakere me aṅine sananjine sembene fuṅne fuṅne oi poretiṅ fukebi sembene ore kosa sase eego. ⁹ Rone Kadi buṅo so maneru

* 7:7: Eks 20.17; Dut 5.21

mutu gobonyon, mimiti buᅇo manebe oiji sabare nobeya ore agiburande anjiji gboreko maᅇne pakereko oi ebon. Agiburaᅇ ebe qokome nuko komiine fukebon.

¹⁰ Anutuji mimiti buᅇo oi boyoberu goku sanaᅇgabemiᅇgo mane nuyayon, buᅇo oi boyobebemiᅇgo soebe qokome nuko komiine fukebon. Komeine fukebon, oiji totogo fukeko bofukebon. ¹¹ Mimiti buᅇo mane mukube dobu kipe nuko oi kigabeminde fuᅇne fukeme mimiti buᅇoji bapakare nuko agiburanji eadu nareko oi ebon. Agiburaᅇ eru buᅇoneke fukebon. Onᅇuine oiji Anuture mimiti buᅇo oiji agiburaᅇ maᅇgo eteko ebe qokome nuko komiine fukebon.*

¹² Onᅇuine fukebonyon, jibu Kadi buᅇo oiji mokiine eru gbagbataeᅇine fukega. Ore mimiti buᅇoineji oi poretiᅇ eru fiine fukega. ¹³ Onᅇuine fukeko mimiti buᅇo fiine oiji qokome nuko komiine fukebon me mata? Oi use! Buᅇo fiineji matayon, Kadi buᅇoji nakene agiburande fuᅇne barariᅇga nareko mane mukubon. Agiburande mimi totogo fukeko mokiineke manebemiᅇ ore eru mimiti buᅇo oiji agiburande dobu kipeme maᅇneji pakereko kigaru agiburaᅇ ebon. Nake agiburaᅇne oiji qokome nuko komiine fukebon. Onᅇu.

Maᅇne agiburande mamari peko gogo.

¹⁴ Moro Tiriineji Kadi buᅇo noreko poretiᅇ fukega, oi manegobeneyon, nonji agiburaᅇ ᅇi fukeru aᅇine sanaᅇine sembeneke fukego. Waki

* **7:11:** Jen 3.13

qabe agiburanji siŋaŋ nuko reŋgaru kiŋaŋine qaku agiburaŋ eego.

¹⁵ Ore eru ya fiine eiŋgo maneego, oi so eego. Oiyon, ya sembene ebemiŋgo useru misomben eego, nonŋ oi eego. Ore eru ya eego, nonji ore fuŋine soine so mane mukuego.* ¹⁶ Ore eru ya sembene eiŋgo tataki eru oi eego ine, Kadi buŋoji jibu fiine fukega. Kadi buŋore nonŋ maŋmoakon ego.

¹⁷ Onu fukeme nonji nake oi so jikigaru eegoyon, agiburaŋ maŋneo pega, oiji bapakare nuko oi eego. ¹⁸ Eebobo fiine ebeminde ani fofori maneegoyon, oi ebeminde usunji so fuke nareega. Ore eru nonde maŋneo ya fiine mo so pegayon, maŋsakineji agiburaŋ ebemiŋgo ore bapakare nareega, oi manego. ¹⁹ Ore eru ya fiine ebeminde ani maneego, oi so baegoyon, ya sembene so ebemiŋgo maneego, oi eego. ²⁰ Onu fukeko ya ebemiŋgo useego, oi jibu baego ine, oi nake so jikigaru baegoyon, agiburaŋ maŋneo pega, oiji bapakare nuko oi eego.

²¹ Ore eru nakene fuŋne inji peko bofukeego: Ya fiine ebeminde ani manebe sembenere anji maŋne kipeme quŋgaego. ²² Ore fuŋine oi inji: Maŋneji Anuture Kadi buŋore maŋmoakon eru reŋgabemiŋgo maneego.

²³ Onu maneegoyon, saki funeo nakene fuŋne inji peko bofukeego: saki funere tife yonŋoji agiburande qoru fukebi ebemiŋgo maneego. Agiburaŋ ebeminde anji maŋ aŋine fiine oi bawaki ruaiŋgo maneko jogbasasanaŋ eegobire. Agiburaŋ

* **7:15:** Gal 5.17

ebeminde anjine sananjineji saki funere tifeine tifeine boburo yaberu kipe nuko nigin witio gogo. ²⁴ O nonji sembea foreru wuwunujneke fukego. Manjakinere anj sembeneji oga nuko kome sananjine egu komebemingo ore moji duene baku munaj qa narena?

²⁵ O Yesu Kristo Ofojne, inoji manjo enareko “Anutu danje!” migo. Fuñeji onjine fukeme nake manjeji akonj Anuturo Kadi bujore ruru-manjo raru kinanjine qaegoyonj, saki fune agiburanjineke onjineji agiburanj ebeminde anjine sananjineji kipe nuko ore nigin witio gogo. Onju.

8

Moro Tiriineji oodesinononj fukeko sananjaru gogobenenj.

¹ Ore eru njingigo Kristo Yesuke qakatoru dimagobenenj, Anutuji nonjunde bujo mitarime damanj yoo misi korure binje so fukeru gogobenenj. ² Ore fuñine inji: Go agiburande anj rengaru gomenj ore eru kome sananjine binje fukeru gomenj. Onjine gomenjyonj, Kristo Yesuke qakatoru dimande gogo sananjine Morojo kome sananjine niginjone pirue gareko gogo.

³ Njingigo manj sakinonjongo anjinoñonj sananjine sembene oi pega. Oi boyobebenenj Kadi bujore tobiriji wirieru gogo sananjine noreingo embimbijgako qunjabenenj. Qunjabenenj manj sakinonjoni agiburanj eru gobenj, Anutuji agiburanj ore bujohne mitariku tifeine inji bokirieya: Inoji

inyoyonunde Made soreme morengo wakiru agiburan nire saki onjuine fukeya. Jikigaru agiburande boji kamasi onjuine fukeko rigabi komeya. Anutuji gogo sananinere fune onju bataningaya.

⁴ Anutuji fune oi yoore eru bataningaya: Kadi buñoji nonun posiine eru poretin gokimin ore mitiga noreega, Anutuji buño ore foriineji nonunde fuke forengo maneya. Ore eru mansakinonunde ani sananine sembeneji so sinan nobeingo useru Moro Tiriinere man ani rengakimin ore dimaegobenen. ⁵ Ninigo mansakiyanunde ani sananine sembene boyobeegobi, yonore manyanunji agiburan einjo ore pega. Ninigo Moro Tiriinere ani boyoberu eegobenen, nonunde manji Moro Tiriinere eebobo ekimin ore pega. ⁶ Mansakinonunde ani sananine sembeneji furu nobeko kome sananine oobe rakimin ore pegayon, Moro Tiriineji mannonungo womo eme sanangaru gokiminde ani maneega.

⁷ Anutuji Kadi buño noreko agiburan ekiminde ani sananineji buño ore rurumango so raega. Oi rainjo embimbimgaga. Oi embimbimgako kosa goku mannonunji Anutu igogaru rosi eteegobenen. ⁸ Ninigo man sakire aniyangun sananineji sinan yabebi kosa gogobi, yonoji Anuture jinoo saganimin ore qunganimin.

⁹ Yonoji qunganiminyon, Anuture Moro Tiriineji nonore mango goga ine, inoji sinan nabeko gogobi. Man sakire aniyangun sananine sembene yonoji nono so sinan nabeeegobi. Kristore Moro Tiriineji more mango so rakame

omaine goga, iṅoji Kristore biṅe so fukega. ¹⁰ So fukegayoṅ, Kristoji ṅoṅore maṅgo goga ine, saki fuyaṅunji agiburande eru komenimiṅyoṅ, iiruṅaṅunji posiine fukegobi ore eru sanaṅgaru go ropenimiṅ. ¹¹ Anutuji Kristo Yesu bogboreme komegone pakereya, iṅore Moroṅi maṅ-ṅaṅuṅgo goga ine, yokoṅi ṅoṅo Anutuke qakatoru dimakabi sakiṅaṅuṅ komekiine oi oṅuakoṅ bogboreni.^{*}

¹² O maṅkekerisie ogopune, gboreru gogobeneṅ ore niṅoji Anuture tifeke gogobeneṅ. Maṅ sakire aṅinoṅuṅ sanaṅine sembene boyobeniminde tife matayoṅ, Moro Tiriinere mi reṅgaru gokiminde tifeji oi pe norega. Ore eru noṅunde aṅigo kosa egu gokimiṅ. ¹³ Maṅ sakire aṅiyaṅuṅ sanaṅine sembene boyoberu gogobi ine, ṅoṅo kome sanaṅinere biṅe fukenimiṅ. Oṅu fukenimiṅyoṅ, Anutu oṅga wosibi Moro Tiriineji maṅsakiṅaṅunde eebobo sembene bokomeeiṅ ine, oṅuine oo gboreru sanaṅgaru go ropenimiṅ. ¹⁴ Anuture Moroṅi ṅiṅigo qotiṅgaru oga yabeko gogobi, yoṅoji sosowo Anuture odumadepu fukegobi.

¹⁵ Gemokaku yoṅoji ṅiṅigo boburo yabebi gburugburu yabeko kiṅaṅqoqo omaine fukeru gogobiyoṅ, ṅoṅo gemo oṅuine oi mo matayoṅ, Moro Tiriine oi biṅe qoqo eku gogobi. Ore eru ṅoṅo moke jikigaru kokoi paio egu goinebi. Moro Tiriine iṅoji qowirie ṅabeme Anuture odumadepu fukegobi. Moro oiji boburo nobeko Anuture

^{*} **8:11:** 1 Kor 3.16

“Aba* Mama!” ongaegobenenj.* ¹⁶ Anutуре odumadepu fukegobenenj, buŋo oi Moro Tiriineji inoyonje nonunde iiruke qotikeru moko kitingaku miegobire.

¹⁷ Anutуре odumadepu fukegobenenj ine, inoji inoyonunde njingopuine nonunde ore senjinbanjin bomogako pega, oi onuakon raugakiminj. Anutuji Kristore ya bomogako pega, oi onuakon Kristore qanango dimaku raugakiminj. Kristoke moko joisererenj manegobenenj ine, onuakon Kristore kuririquranjineo roperu injoke moko tamaeru gokiminj. Onu.*

Gogo kuririquranjinekeo roperu gokiminj.

¹⁸ Damanj yoo joisererenj maneru gogobenenj, oiji gogo wakiqoqoine fukega. Jiki Kristore kuririquranjo roperu tamaeru senjinbanjin gokiminj, oiji gogo ropekiine kuririineke fukeinj. Gogo yoyoka oi mobemobe eru osoekiminj ore so mata. Onu manesugo. ¹⁹ Anutuji joma eru ya sosowo bofukeme pegobi, yonoji odigaru Kristoji wareru Anutуре odumadepu bomukuru yaduko kuririquranj fuke yareinj ore anj sogo manegobi.

²⁰ Anutuji joma eru ya sosowo bofukekeyayonj, yonoji goku komeru mataeniminj. Yonoyanunde anjire so matayonj, Anutuji inoyonunde anjire so onu burugaya. Ya sosowo mataeniminjonj, jibu oori yareme senjinbanjin inji fukeingo odigae-gobi.* ²¹ Anutuji joma eru ya sosowo bofukeme

* **8:15:** Aba oi Arameik bunoo mama. * **8:15:** Mak 14.36; Gal 4.6 * **8:17:** Gal 4.5-7 * **8:20:** Jen 3.17-19

pegobi, yoŋoji oŋuakon yoore eru odigaegobi: Anutuji oi oŋuakon wuwunuŋ gogore niginigone pirue yareme so komeru goregaru mataen-imiŋyoŋ, Anuture odumade oŋuine ŋeririkeru kuririquanyaŋuŋke tamaeru pe ropenimiŋ.

²² Ore fuŋine oi iŋi: Anutuji joma eru ya sosowo bofukeme pegobi, yoŋoji sosowo moko nakafe poreru odumade rorore goji kiyabeega, oŋuine maneru pe waperu damaŋ yoo oŋuakon eegobi, oi manegobeneŋ. ²³ Anutuji joma eru ya sosowo bofukeme pegobi, yoŋoreone matayoŋ, Anuture bobosu fukebeneŋ Moroine Tiriine yaun noreko gogobeneŋ, noŋuŋ oŋuakon maŋnoŋuŋji nakafe poreru goegobeneŋ. Anutuji oga nobeko odumadepu fuŋine mo fukekimiŋgo odigaru goku nakafe eegobeneŋ. Oga noberu duenoŋuŋ bako sakinonŋuŋ fuŋine mo raugaru Sombuŋgo roperu fiaŋgo ore aŋi sogo maneru gogobeneŋ.*

²⁴ Oŋuine qowiriekimiŋ ore oori eru maŋnoŋuŋ kerisieru Sombunde biŋe fukekimiŋ. Ya fukeiŋ ore oori eegobeneŋ, ore foriine fukeko ŋonebeneŋ oorinoŋuŋ oŋuine oiji tariiŋ. Moji yare foriine fukeko ŋoneru ore ooriine oi so jikigaru eru odigaega. Oi mata. ²⁵ Yare foriji so fukeko ŋoneegobeneŋ, ore oori egobeneŋ ine, oi yameŋ keku fukeiŋgo odigabeneŋ maŋnoŋuŋ so wakiega.

²⁶ Oŋuakon wiriebeneŋ Moro Tiriineji bapi nobeega. Uruŋu oŋga wosikabeŋ sagana, oi so manegobeneŋyoŋ, Moro Tiriineji inoyone oŋgawowosi gionoŋuŋgo bapi noberu noŋunde

* **8:23:** 2 Kor 5.2-4

ore eru oṅga wosigaru buṅo miine totogo mimore so matayon, nakafe paiineo saṅugo miega. ²⁷ Saṅugo miku Anuture anire so ṅiṅigo gbag-bataeṅine noṅunde eru oṅga wosiega. Anutuji ṅiṅigo maṅnoṅuṅ ṅoneru osoeega, iṅoji afagaru Moro Tiriinere maṅ mamane maneege.

²⁸ Anutuji oṅgawowosiine maneru yareya sosowo siṅaṅ gako ore qoqodure foriineji iṅoyonunde ogopuji fianimiṅgo fukeega. Oi manegobenṅ. Foriine oiji ṅiṅigo munaṅqoqo buruinere so oṅga yareko manjoko eteegobi, oi oṅu me oṅu bapi yabeega. ²⁹ Anuture burure fuṅne oi iṅi: Iṅoyonunde Madeineji maṅkekerisie ogo boakon noṅunde botugo mine ba noreiṅgo maneege. Ore eru ronekon buru rua noreko kamasinoṅunji Madeinere so fukekiminṅo maneya. Ore eru ṅiṅigo ronekon mane noreya, niṅo oṅuakon fukekimiṅ ore miku roosoe nobeya. ³⁰ Ronekon miku roosoe nobeya, noṅuṅ oṅuakon oṅga noreya. Oṅga noreya, noṅunde buṅo oṅuakon mitarime posikeben. Posikeben, noṅunde oṅuakon kadi bataniṅgako iṅoyonunde kuririquraṅineo roperu seṅiṅbaṅiṅiṅ gokimiṅ. Oṅu.

Anuture manjokore mimiten kiki.

³¹ Buṅo oi maneru ore uruṅu minoben? Anutuji sa kipe noberu mobenoṅuṅgo goga ine, moji qomuku norena? ³² Anutuji iṅoyonunde Made oṅuakon so sabareyayon, oi mitarime gogoine sosowo noṅunde eru kisiṅgaya. Oi kisiṅgako Anutuji iṅoke yaṅ wakimiine goine sosowo oi oṅuakon afagaru noreiṅ.

³³ Anutuji ñijigo inoyonunde roosoe noberu bujononun mitarime posikeegobeneñ, ore eru moji buño koroino rua nobena? ³⁴ Kristo Yesuji komeko Anutuji moke bogboreme Sombuño roperu Anuture me furoineo ñeku jikigaru nonunde eru onga wosiega. Ore eru moji mo bujononun osoeru misi korugo rakakimiñ ore mitari noreiño embimbiñgaiñ.

³⁵ Kristore manjoko manineo gobeneñ moji oone boroiña nobeko wakinobeñ? Suroñqoqo enorekabi koñkoñ manenobeñyon, Kristore manjokogone soine so wakikimiñ. Kekesuesue enorenobunyon, oone soine so wakikimiñ. Roro bofukenebeñ me kambañ sokinoñunji mataame gonobeñ, soine so wakikimiñ. Egu komekiminde kokoi paio gonobeñ me jigo qabi rosi fukenayon, soine so wakikimiñ. ³⁶ Ore buñoine oi Biñe Qurango inñi qurangoñ pega,

“Gore tinare eru kae fufurere akon fungaru nobebi komekimiño manebi ragu kae ubu eega. Lama yaberu noegobi, onjuine akon niñore manesuegobi.”*

³⁷ Buño ore so enorenobunyon, Kristoji manjokoine barariña nobeko manebeñ, inoji kitiñ nobeko yobiñ sosowo oo gbiñ eru kokorian eru gokimiñ. ³⁸ Ya moji Kristore manjokoineone boroiñ nobeiño embimbiñgaiñ. Oi foriine yobu mane mukugo. Komeji me gogore yaine moji boroiñ nobeiño embimbiñgaiñ. Sombun mimerereñ me gemokaku yonoji damañ yoo me jiki niño boroiñ nobenimiño embimbiñganimiñ. Apa

* **8:36:** Kiki 44.22

ɲaso ɲonemeqoti usunyanunke yonɔoji oi embimbiɲganimiɲ.

³⁹ Paibere paibe me yukire yukuineo gogobi, yonɔoji boroiɲ nobenimiɲgo embimbiɲganimiɲ. Anutuji yareya goine mo bofukeme pegobi, yonɔoji onɔuakon Anuture manjoko oone boroiɲ nobenimiɲgo embimbiɲganimiɲ. Anuture manjoko oiji Kristo Yesu Ofoɲnoɲun inoreo fukeko barariɲga noreme oi manegobeneɲ. Onu.

9

Anutuji anjinere so Israel roosoe yabeya.

¹ Nonji Kristoke qakatoru dimaku buɲo ikoine matayon, buɲo foriine yobu mo mibemiɲ. Moro Tiriinere buɲore kaje ruabe buɲone kitiɲgaku misanaɲgaru maɲneo saɲu enareko inɲi maneru migo: ² Nonji Juda ɲiɲigo goine yonɔore beusembe bubuji nuko maɲneo joiserereɲ yasogo tatariine tomiri inɲi ore maneego:

³ Yonɔoji noke moreɲ sakiji Israel kufufun moakon fukego-beneɲyon, manyanunji Kristoke so qakatoru kosa gogobi. Nonji Israel ogopuneji manyanun kerisienimiɲgo jogbasanan eego. Anutuji yonɔore buɲoyanun osoeko nake yonɔore tifeyanun fukebe goine bokirieru nonde paio inɲi ropeiɲgo manego: Inɔoji non Kristo inoreone boroiɲ nuko misi korure biɲe fukeiɲgo manego.

⁴ Yonɔoji Israel kubu maɲineo gobi Anutuji oga yabeme biɲeine fukegobi. Anuture tinabiɲe osigaru kuririyannunke fukegobi. Anutuji yonɔoke senɲinbanɲin fukeniminde jojofu ranɲbanɲine eru gariine eru Kadi buɲo yareya. Ore eru boji

soriŋgo roperu Anuture ohowe baku miteŋ gae-gobi. Anutuji mifiaine saueinde buŋo kipeya, ore foriineji fukeiŋgo odigaegobi.* ⁵ Yoŋoji mimi-nenoŋuŋ Abrahamde osigidapu yoŋore ŋaso madepuyanŋuŋ gogobi. Kristoji yoŋoreone moreŋ saki fu roru ŋi fukeya. Kristoji Anutunoŋuŋ fukeru ya sosowo siŋaŋ gako tinaine damaŋ tatariine tomiri miteŋ gaekimiŋ. Buŋo oi fofori.

⁶ Oŋuine gogobiyon, Israel kufufuŋgone fukeru saueru gogobeneŋ, noŋuŋ sosowo jibu Israel ŋiŋigo foriine so fukegobeneŋ. Ore eru Anuture buŋoji tiriko usuŋineji wawakiine fukeega me? Oŋu minobeŋ, oi buŋo foriine mata. ⁷ Abrahamde osigidapu yoŋoreone fukegobeneŋ ore eru sosowo noŋuŋ Anuture odumadepu so fukegobeneŋ. Oŋu matayon, Anutuji Abrahamde iŋi ojiya, “Aisakre ŋaso madepuji goreo jikigaru tinago osigaru go ropenimiŋ.”*

⁸ Buŋo ore fuŋine oi iŋi: Abrahamde osigidapu moreŋ ŋiŋigo mosiji odumade fukeegobeneŋ, sosowo noŋuŋ Anuture odumadepu so fukegobeneŋ. Oŋu matayon, Anutuji buŋo kipeme pega ore so fukebeŋ, Anutuji niŋo maneru noreko Abrahamde osigidapu foriine fukegobeneŋ. ⁹ Jojofu buŋo oiji Abrahamdeo iŋi wareko maneya, “Gosa moakon tariko oo moke wareru ŋone gube Saraji madeineke fukeiŋ.”*

¹⁰ Buŋo oŋu maneko iŋoreo oi fukeyayon, oo so tariya. Iŋore ŋadio Rebekare oŋuakon Anuture buŋore so fukeya. Apanoŋuŋ Aisak iŋoji ŋonoŋine

* 9:4: Eks 9.4 * 9:7: Jen 21.12 * 9:9: Jen 18.10

injo kua oteko madeyokayakuᅇ gboᅇbodo fukebu.
 11 Gboᅇbodo yokoᅇi beu maᅇneᅇo ᅇneku so fukeru
 ya fiine me sembene mo so ebu, Anutuᅇi damaᅇ
 oo made yokoreone mo inᅇoyonunde roosoeya.
 Inᅇoyonunde mamane buruᅇi sanaᅇᅇaru foriineke
 fuke foreiᅇ ore eru gboine roosoeya.

12 Inᅇoyonunde maᅇ anᅇi foriineke fukeiᅇ
 ore eru Rebeka inᅇ oᅇiya, “Kakaineᅇi gboinere
 kiᅇaᅇᅇoᅇo fukeru mea rurumaᅇᅇo goiᅇ.” Anutuᅇi
 oᅇu ojiru eeboboyakuᅇ eenobu ore so oi so osoe
 yapeyayon, inᅇoyonunde anᅇiine akonᅇ boyoberu
 gboine oᅇᅇa teme kakainere soguine fukeya.*

13 Ore buᅇoine oi Biᅇe Quraᅇᅇo inᅇ quraᅇᅇabi
 pega, “Jeikob maᅇneᅇi manjoko eteru gobonyon,
 Esau (Iso) oi use teru rosi eteru gobonᅇ.”*

14 Buᅇo ore uruᅇu minobeᅇ? Anutuᅇi poretiᅇ
 so fukeᅇa me? Onᅇuine mata yobu! 15 Anutuᅇi
 Mosesre buᅇo inᅇ ojiko pega, “Nonᅇi nake anᅇe
 boyoberu mo wamo ᅇoneru embonᅇ eru ᅇonemaᅇ
 etebemiᅇᅇo manego, oi ᅇonemaᅇ eteego. Mo
 wamore beusembe etebemiᅇᅇo migo, inᅇore oi
 beusembe maneego.”* 16 Buᅇo ore eru moreᅇ
 ᅇiᅇi Anutu so siᅇaᅇ gaegayon, yare anᅇiine maneru
 eiᅇᅇo esoigaru bibienayon, oi jibu Anutu so
 odureiᅇ. Anutu inᅇoyonᅇ yaunᅇmoririre so ya
 sosowo siᅇaᅇ gako inᅇore meo pega.

17 Anutuᅇi farao kiᅇ buᅇo ojiko Biᅇe Quraᅇᅇo inᅇ
 pega, “Nake biᅇerorone misauebi moreᅇ sosowo
 sagaᅇᅇᅇo manego. Onᅇu maneru usuᅇne barariᅇᅇa

* 9:12: Jen 25.23 * 9:13: Mal 1.2-3 * 9:15: Eks 33.19

yarebe totogo fukeiᅅgo bapakare gube goji fukemenᅅ. Fukeru goku kiso enareku gokande gbiᅅ egareboᅅ.”* 18 Buᅅo ore so Anutuji iᅅoyoᅅunde aᅅi boyoberu mo ᅅoneru embonᅅ eru ᅅonemaiᅅ eteiᅅgo manega, oi ᅅonemaiᅅ oteeiᅅ eru more maᅅ kebojigabeminde manega, oi kebojigame qoqomuku fukeeiᅅ. Oᅅu.

Anuture yombeᅅ eru ᅅonemaiᅅ

19 ᅅoᅅoreone moji nonde iᅅi mina, “Oᅅu fukeme sosowo noᅅuᅅ Anuture maᅅ aᅅi kiso etekimiᅅgo embimbiᅅgaegobeneᅅ. Oᅅu fukeko Anutuji wamore jikigaru minoreega?” 20 Moji oᅅu minayoᅅ, moreᅅ ᅅi go wamo fukeru Anutu kiso eru kekepari etena? Mequranji iᅅoyoᅅunde bobofuke Rau iᅅi soine so miteiᅅ, “Go wamore kamasi yo oᅅuine bofuke naremeᅅ?”* 21 Dero bobo ᅅiji iᅅoyoᅅunde usuᅅ paio aᅅiinere so afe kerisieru roosoeru afe moakonᅅ oone gbakeᅅ furuine furuine baega. Goine damaᅅ so roru gio oteegobeneᅅ eru goine kuririyauᅅke oi jeri damaᅅineo akonᅅ gio oteegobeneᅅ.

22 Anutu bobofuke Raunoᅅunji oᅅuine akonᅅ enoreega. Iᅅoji yombeᅅine ᅅiᅅigo noduko usuᅅine ᅅoneru manekimiᅅ ore maneega. Oᅅu maneru maᅅine rigaᅅgame rosiineji ᅅiᅅigo goine yoᅅore paio ropeko jaueru ketotie yabeᅅgo eru goya. Oi jibu geoine pipa akonᅅ so bokirie yareyayoᅅ, yoᅅore eru joiserereᅅ kokoine mane karieru maᅅyauᅅ kerisieniminde odigaru goya.

* 9:17: Eks 9.16 * 9:20: Ais 29.16; 45.9

²³ Onjine akonj yaunmoririine bararinga yareko boakonj yobu fukeinggo maneega. Onj maneru njinggo kuririine raugakiminj ore rosoe nobeya, nonjnj njone noberu embonj nobeme kuriri-ineke tamaegobenej. ²⁴ Nonjnj onjwakonj onjine fukekiminj ore onga noreya. Juda njinggo akonj matayonj, kotu kantriine kantriine oi onjwakonj onjine fukeniminj ore onga njareya. ²⁵ Anutuji ore bujone miko kajeqounj nj Hosea injore quranjgo inji pega,

“Njinggo nakene kufufunpu so fukeru gobunj, nonji oi onga yarebe nakene kufufunj fukeniminj. Goineji nakene wombunj ogopu so gobunj, yonjore ‘Nake wombunj ogopune,’ onj miku gobeminj.”*

²⁶ Nonji morenj more njinggo yonjore inji miku gobonj,

‘Njono nake kufufunpune so gogobi.’ Onj miku gobonjonj, oi morenyanjungo oone onga yareru tinayanjnj inji mibeminj: Njono Anutu gogo Rauinere odumadepu fukegobi. Qaqotinj onjine fukeinj.”*

²⁷ Aisaiaji onjwakonj Israel kufufunj njore eru inji kuyoku miya, “Israel njinggo jarenonjonj koe magenj ore so fukena ine, oi jibu njoreone afaineji manjonjonj kerisiebenej munanj qa nor-einj. ²⁸ Ofonji morenjine morenjine sosowo nonjunde bujo afaine osoeru mitariku goeine sosowo bokirie nore foreinj.”*

* **9:25:** Hos 2.23 * **9:26:** Hos 1.10 * **9:28:** Ais 10.22-23

29 Aisaiaji oŋu miku ronekoŋ buŋo mo miya, ore foriineji niŋoreo iŋi fukega, “Ofon usun sosowore Raunoŋunji osigidapunoŋun goine so ŋone yaberu emboŋ eru manyaŋun kerisienobun ine, moreŋnoŋunji Sodom oŋuine kerisieme rakame misi jana. Niŋoji Gomora ŋiŋigo oŋuine sibiriganobun. Anutuji oŋuine enorena.” Oŋu miya.*

Israel boakoŋ yobuji Anutu qoqomuku eteebi.

30 Ore eru urunŋu minobeŋ? Kantri goineji Anuturo jinoŋo posiine fukekiminde gio so yameŋ keku babun, yoŋoji Anuturo jinoŋo posikegobi. Manyaŋun kerisieru Anutu manesiŋ gabi ore eru buŋoyaŋun mitarime posiine fukeru gogobi. 31 Oŋu gogobiyon, Israel niŋoji posiine fukekiminde Kadi buŋo boyobekimiŋ ore yameŋ keku go waperu oi jibu Anuturo jinoŋo so posikebeŋ.

32 Ore fuŋine oi iŋi: Yoŋoyoŋe akoŋ esoiku eebobo poretiŋ eku oŋuine oiji posiine fukekimiŋ ore yameŋ keku Yesu so manesiŋ gabun. Iŋoji ko sanaŋ qanqanine oŋuine fukega, iŋoreo odetatanŋaru yabeko qunŋaru ŋadi gabun. Ore eru posiine so fukebun. 33 Ore buŋoine oi Biŋe Qurango iŋi quranŋabi pega,

“Ŋnoneniŋ, Anutu nonji aeŋ ko mo Zaion tukuo Israel kubu manyaŋunŋo saribe yoŋoji oo odetatanŋaru wakiru yabeko ŋadi gaenimiŋ. Moji ŋi yoine sanaŋ qanqanine oi manesiŋ gateiŋ, iŋoji damanŋ mogo iŋore dimaku mimiganŋan so bofukeiŋ.” Oŋu.*

* 9:29: Ais 1.9 * 9:33: Ais 28.16

10

¹ O maŋkekerisie ogopune, nonji nakene Juda kufufunpune manyanun kerisienimin ore anjine sogo maneege. Anutuji munan qa yarein ore manne qojugaru yonore eru Anutu onga wosiego.

² Yonore funjeji ini pega: Yonoji Anuture manjo eegobiyon, oi qaqouma paio eegobi. Yonore bunjo onu kitingaku migo.

³ Anutuji bunononun mitarime posikegobenen, ore funjine so mane mukuku yonoyone akon es-oigaru posiine fukekimingo yamen keegobi. Onu eru Anutuji bunononun mitarime posikekimin ore miega, bunjo ore rurumanjo so raru qungaru mo kosa gogobi.

⁴ Kristoji inoyone akon Kadi bunjo boyobe foreya. Niŋo goineji oi embimbingaru Kristo manesin garu maŋnonun kerisiegobenen, onu Kristore eru Anuture jinoo posikegobenen. Onu.

Anutuji nonun sosowo munan qa noreinjo manega.

⁵ Mosesji Kadi bunjo boyoberu onujine oo posiine fukekiminde bunjo oi ini qurangame pega, “Kadi bunjo boyobe forein, inoji ore eru gogo sanajine bofukein.”*

⁶ Bunjo onu pegayon, maŋnonun kerisieru manesin gakabenen Anutuji bunononun mitarime posikegobenen, Mosesji ore eru bunjo ini miko pega, “Maŋgoo ini manesuku egu mimin: Ni moji Sombun kaeo ropena?” Niŋigoji oi Kristo ogagaru wakiin ore kosa mibun.* ⁷ Me “Ni moji kome kaere dikiineo

* **10:5:** Lew 18.5

* **10:6:** Dut 30.12-14

rakana?” Niṅigoji oi Kristo ogagaru komegone pakereṅ ore kosa mibuṅ.

⁸ Onu miku jikigaru iṅi miya, “Biṅe buṅo oi jorigo matayoṅ, gore migoo eru maṅgoo pega.” Biṅe buṅo oi manesiṅ ganimiṅ ore pega. Niṅoji buṅo oiji ṅiṅigo maṅ bapakare yareru iṅi mitaṅga ṅareegobeneṅ: ⁹ Anutuji Yesu bogboreme komegone pakereya. Goji buṅo oi maṅ wombuṅgoji manesiṅ garu mi bibigoji “Yesuji Ofoṅne fukega,” onu mifukege ine, iṅo munanṅ qa gareko qowiriemiṅ.

¹⁰ Go maṅ wombuṅgoji Biṅe buṅo manesiṅ gande Anutuji buṅogo mitarime posikemiṅ eru mi bibigoji Yesu mifukende munanṅ qa gareko qowiriemiṅ.

¹¹ Biṅe Qurande buṅo mo iṅi mibi pega, “Moji oi manesiṅ gainṅ, iṅoji mimiine so maneiṅ.”*

¹² Anutuji Juda ṅiṅigo so ṅone aṅi eyareku kantri goine so sure yabeega. Ofoṅ moakoṅ iṅoji sosowo noṅunde Ofoṅ fukeru so moakoṅgo osoe nobeega. Niṅigo oi oṅga wosiegobeneṅ, noṅuṅ sosowo mifaine boakoṅ yobu noreega.

¹³ Ore buṅoine oi Biṅe Qurango iṅi pega, “Niṅigo uri yoṅoji Ofonde tina oṅga wosiniṅ, iṅoji oi sosowo munanṅ qa yareko qowirienimiṅ.”*

¹⁴ Niṅigoji Ofoṅ so manesiṅ gaku iṅore tina oi uruṅu oṅga wosinobuṅ? Iṅore fuṅne so mikabi manebuṅ, oi uruṅu manesiṅ ganobuṅ? Moji Biṅe buṅo so mitaṅgainṅ ine, yoṅoji oi uruṅu manenobuṅ? ¹⁵ Niṅigo mo Biṅe buṅore so sorekimiṅ ine, iṅoji uruṅu raru oi mitaṅgana?

* **10:11:** Ais 28.16 * **10:13:** Joel 2.32

Ore buņoine oi Biņe Qurango inji qurangabi pega, “Niņigo Biņe buņo fiine roru wareegobi, yoņore kadi fonuņyaņuņ manebeneņ anjiine yobu fukega.”*

¹⁶ Oņu qurangabi pegayoņ, nonde Israel kufufuņ foriine yoņoji Bobiaņ Biņe so reņgaru gogobi. Ore buņoine oi kajeqouņ ni Aisaiaji inji nojime pega, “O Ofon, niņo Biņe buņo misauebeneņ moji maņine kerisieru oi manesiņ ganamen?”* ¹⁷ Buņo ore so Kristore buņo misauebeneņ kajeyaņuņgo rakako manebi mamananiņaņuņji oņu fukeiņ.

¹⁸ Mamanesiņ oņu fukeiņyoņ, inji weu ņarego: Biņe buņo oiji Juda yoņore kajego so rakako manebuņ me? Mata, oi manebuņ. Ore buņo oi inji mibi Biņe Qurango pega, “Buņo mibi buņoyaņuņji oi ra wareru moreņ sosowo sagaya. Oi moreņine moreņine paibe yukube mobemobe oo manebuņ.”*

¹⁹ Buņo ore so Biņe buņo oi manebuņyoņ, moke jikigaru inji weu ņarego: Israel niņigoji oi mane taniņgabuņ me mata? Mosesji ronekoņ buņo inji miya,

“Niņigo kufufuņ maņkekerisiere fori tomiri nonji oi muņaņ qa yarebe ņoņore maņyaņuņgo ore eru manetiņotike fukeiņ. Kotu kubu qaqouma gogobi, yoņoji ņoņo ņadurebi mosi oiji Juda ņoņore maņ bapakarebe maņ-ņaņuņ rigaņgame maņ-ņaņuņji pakereiņ.”*

²⁰ Aisaiaji sanangaru dimaku inji miko pega,

* **10:15:** Ais 52.7 * **10:16:** Ais 53.1 * **10:18:** Kiki 19.4

* **10:19:** Dut 32.21

“Niñigo non̄ so baa nuru kosa gobuñ, yoñoji non̄ bofuke nubuñ.

Niñigo nonde fuñnere so weuku gobuñ, nonji fuñne oi yoñore barariñga yarebe ñoneru manebuñ.”*

²¹ Yoñore oñu miyayon̄, Israel niñore buño in̄i no-jime pega, “Una so kae fufurere akon̄ fuñgaru qo-qomuku kufufuñ kajeboji fukeegobi, ñoño nondeo warenimiñ ore oñga ñaberu mewori qaku gobe kae ubu eega.” Oñu.*

11

Israel man̄ineo man̄kekerisie kubu mendaine pega.

¹ Ore eru in̄i weugo: Anutuji in̄oyonunde kufufuñ ñadi nobeya me mata? Oi mata yobu! Nonji oñuakon̄ Abrahamde osigida mo fukego. Nake Israel kufufunde kubu tinaine Benjamin in̄ore man̄go gogo.* ² Anutuji ronekon̄ in̄oyonunde kufufuñ roosoe nobeya, niño so ñadi nobeko gogoben̄eñ. Kajeqoun̄ ñi Elaijare (Eliare) binan̄ oi Biñe Qurango qurangabi pega. In̄oji Anuture in̄oo Israel niñigo miyareru oñga wosiya, ñoño buño mobeine oi manegobi me mata? Buño oi in̄i, ³ “O Ofon̄, yoñoji gore kajeqoun̄ niñigopu yabebi komebi gore boji ririga alataine alataine ketoqototiebuñ. Non̄ moakon̄ boke nubi gobe kamieru rubaru nuiñgo jauegobi.”*

⁴ Oñu miyayon̄, Anutuji oi maneru in̄i bokirieru ojiya, “Go gake akon̄ so gogeyon̄, nonji ñi 7,000

* **10:20:** Ais 65.1 * **10:21:** Ais 65.2 * **11:1:** Fil 3.5 * **11:3:** 1 Kinj 19.10, 14

onʉakonʉ sa kipe yabebe nakene biŋe fukeru nemu ikoine Bal oi so dikanji ke teru goke jikigaru gogobi.”* 5 Buŋo ore so damanʉ yoo onʉakonʉ Anuture kubu mendaine pega. Anutuji yaunʉmoririinere so ŋiŋigo afaine roosoe nobeko gogobenʉ.

6 Yaunʉmoririineji oi manʉo eteko roosoe nobeya. Niŋo eebobo fiine eba eku gonobenʉ, ore eru so roosoe nobeya. Moreŋ ŋiŋigo eebobononʉnji manʉo eteko roosoe nobena ine, inʉore yaunʉmoririji ya omaine fukena.

7 Ore eru uruŋu minobenʉ? Israel kufufunji posiine fukekiminʉo yamenʉ keku gobunʉonʉ, posikekiminde funʉe oi so bofukebuŋ. Yoŋoji matayonʉ, Anutuji kubu mendaine roosoe nobeya, niŋoji yaunʉine oi bofukeru posiine fukebenʉ. Goineji mamane sembeneji manʉyanʉŋ kejiame omaine kosa gogobi. 8 Ore buŋoine oi Biŋe Quraŋgo inʉi quraŋgabi pega, “Kubanjiŋojiŋo gobi Anutuji gemo so kipeme manʉyanʉŋo rakame komiine fukebuŋ. Ya ŋoneru funʉine egu ŋone mukuniminʉ ore jiŋoyanʉŋ bokobeko dabu eya. Buŋo kajeyanʉnji maneru egu mane taniŋganiminʉ ore oi kejiaya. Onʉ mutu go waperu damanʉ yoo onʉakonʉ mo kosa gogobi.”* 9 Kiŋ Deiwidji ore buŋoine inʉi miko pega,

“O Anutu, yoŋoji jebe rigaru ruaru noku kosa jerieegobi. Oo bofuke ŋone yaberu agiburanʉyanʉunde ore bitinʉ rua yareigonʉ.

* 11:4: 1 Kiŋ 19.18 * 11:8: Dut 29.4; Ais 29.10

Yonoyanunde neneo odetatanḡaru waki yabeko geoine bokirie yabende joisereren maneinebi.*

10 O Anutu, go jinoyanun bokobende piku noneinḡo embimbinḡaniminḡ.

Go geoine bokirie yabende paiyanunḡo roperu yobinḡame jijiki daberu goinebi.”

Deiwidji onu onḡa wosiya.

Kotu kantri yonoji Anuture yo foriine fukebuḡ.

11 Jikigaru inḡi weugo: Juda kufufun foriine yonoji odetatanḡaru waki yabeko manyanunḡi kejinḡame fianiminde embimbinḡaniminḡ me mata? Oi so embimbinḡaniminḡ! Waki yabeya, oiji Anutu mane mukuinde anḡi sogo maneniminḡ ore fukeya. Juda kufufun foriine yonoji kadi odureru waki yabeko kotu kantri yonoji tifeyanun fukeru manyanun kerisieru Anuture binḡe fukebuḡ. Onu fukebuḡ, oiji manyanun bapakareko ore eru manyanun riganḡame manyanun kerisieniminde anḡiji fukein ore eru onḡu fukeya.

12 Juda kufufun foriine yonoji kadi ririru waki yabeko ore eru kotu moreḡine moreḡine yonoji senḡinbanḡin fukekiminde funḡe bofukebuḡ. Oi bofukeru manyanun kerisieru mifia manineo gogobiyon, Juda kufufun foriine yonoji mutu goku Anuture jinoo so sagagobi. Jiki Juda yonoji onḡuakon sosowo manyanun kerisieniminḡ. Onu fukeko Anuture mifiaji saueru boakon yobu to-togo fukein.

13 Nonji buḡone yo Juda nonore matayon, kotu kantri kufufun nonore migo. Nonji kotu

* 11:9: Kiki 69.22-23

kantri ɲoɲore sosore ɲi aposol fukego ore “Gione tinabiɲeineke fukega,” miku oɲu manesugo. ¹⁴ Gione oi babe foriine fukeko maɲ-ɲaɲuɲ kerisieegobi, nakene Israel kufufuɲpuneji ore sunduine manenimiɲgo yameɲ keku aɲi sogo maneego. Biɲe buɲo oiji moakoɲ moakoɲ yoɲore manyaɲuɲ bapakareko ore eru manyaɲuɲ rigaɲgame manyaɲuɲ kerisieniminde aɲiji fukeko kerisiebi Anutuɲi munaɲ qa yareɲ. Gione tinabiɲeineke oi ore eru kotu kantri ɲoɲore botugo baego.

¹⁵ Anutuɲi Juda kubu ɲadi nobeko ore foriineji iɲi fukeya: Kotu kantriine kantriine ɲoɲoji tifeyaɲuɲgo fukebi Anutuɲi furɲaɲuɲ baku oga ɲabeme ogopuine fukebuɲ. Juda kufufuɲ foriine yoɲoji manyaɲuɲ kerisiebi Anutuɲi munaɲ qa yareru mane sabareku oga yabeɲ, ore foriineji oi komegone gboreru goku sanaɲganimiɲ so fukeɲ.

¹⁶ Gosa bobosu gariineo uqo Anuturo osoeru ruaru jeri ebeneɲ gbagbataeɲine fukega ine, giore uqo munjaɲ sosowo oi oɲuakoɲ gbagbataeɲine fukega. Yo goduineji tiriine fukega ine, tienɲeji oɲuakoɲ tiriine fukegobi. ¹⁷ Juda kubu oi Anutu iɲoyoɲere oliwe yo fukega. Anutuɲi iɲoyoɲere oliwe yo oi foriine yobu roru tienɲe goine ketigame wakibuɲ eru gomende oliwe yo tienɲe roru wareru botuyaɲuɲgo ruame jikigaru sogueegobi. Kantri goine ɲoɲo gomende oliwe yo oɲu so fukegobiyon, Anutuɲi jibu oga ɲabeme damaɲ yoo yo tienɲe fuɲine mo yoɲore botugo goku sanaɲgaegobi. ɲoɲo Juda kubure oliwe yo goduineone uqo obuine poreru noku sogueegobi.

18 Nono Juda ninjoke dimagobiyon, jibu Juda nodureru sakinanun egu ba ropenimin. Sakananun ba ropenobun ine, bunjo yo manebini: Kantri goine nono yo tienine akon onjine fukegobi. Nono godunonun so osigaegobiyon, ninjore yo goduineji oi osi nabeme dimagobi.

19 Bunjo ini minobun, “Anutuji nonun inyonunde yo botuineo rua nobein ore eru yo tienine oi ketigame wakiko sawaine fukeya.” 20 Bunjo oi foriine. Anutuji Juda ninjigo manyanun so kerisieru manesin gabun ore eru keti yabeko wakibunyon, nono mamananin-nanunjo odesingarun qin keru dimagobi. Onu dimaku jauba-irinbirin so fukeru sakipepe eru goinebiyon, ini egu waki nabein ore sombunanun maneru goinebi: 21 Anutuji inyonjere yoinere tien foriine so none yabe embon eru Juda kufufun keti yabeya ine, nono oi “Soine none nobe embon ein,” onu egu minimin. Omaine onjine manesuku kosa egu goinebi. 22 Ore eru kotu kantri nono Anuture funne manesuku ini minimin, “Juda ninjigo kadi ririru waki yabeya, Anutuji ore goine bokirieru fofori joineke eyareegayon, nonun bobian Rauineke qakatoru dimabenen bobian nobeega. Injoke so jikigarun dimakimin ine, kantri goine ninjo onjikon keti nobeme wakikimin.”

23 Onu soine miniminjon, Anutuji ninjigo kadi riribun, oi onjikon soine sanangaru yo botuineo moke jikiga yarein. Ore eru Juda kufufun yonjoi qoqomukuyanun bokeru manyanun kerisienimin

ine, oi soine Yesuke jikiga yarein. ²⁴ Anutuji ñoño gomende oliwe yo oone keti ñaberu ke sasarire kadi odureru oliwe yo funine more botugo ruaru jikiga ñareya. Kantri goine ñoño oñuine eyareya ine, ore eru inoyonunde yo tienine foriine Juda kufufun foriine oi afagaru oga yaberu anjiineo inoyonunde oliwe yore botugo rua yabeme moke jikiganimin. Onu.

Anutuji Israel sosowo ñonemain noreingo manega.

²⁵ O mankekerisie ogopune, ñoño-ñañunde manğboron paio kosa egu gonimin ore buño sumunine mo bararinga ñarebe mane taniñganimingo manego. Buño oi inji: Mamane sembeneji Israel kufufunde mobe mo yonore manyanun kejjigame gogobiyon, daman tatariine tomiri qoqomuku so jikigaru gonimin. Matayon, rone kotu kantri yonoreone boakon yobu yonoji manyanun kerisieru Anutire qoruman manineo wapenimin. Onu ebi Anutuji jareyanun ñoneko sagain, daman oo Juda kufufun ninore qoqomuku damannonunji tariko sosowo manyanun kerisienimin. ²⁶ Manyanun kerisiebi Anutuji Israel kufufun sosowo munan qa yareko qowirienimin. Ore buñoine oi Biñe Quraño inji qurañgabi pega,

“Munañqoqo Rauineji oi Zaion tukuone fukeru Jeikob kubu ninore eebobo wuwununineke oi keririkein.*

* **11:26:** Ais 59.20

27 Anutu nonji agiburanyaŋuŋ kerikeru senŋinbaŋŋin bofukeniŋin ore jojofoburuine oi yoŋoke ebe moko gokimiŋ.”

Buŋo oŋu pega.*

28 Juda kufufuŋ foriine yoŋoji Bobiaŋ Biŋe ŋadi gaku Anuture rosipu fukebuŋ ore kantri goine ŋoŋoji tifeyaŋuŋgo Anuture ogopu fukegobi. Oŋu fukegobiyon, Anutuŋi Israel fuŋgbodupunonun roosoe yabeya ore Juda niŋoji jikigaru yoro ogopuine foriine yobu fukegobeneŋ. 29 Anutuŋi ŋiŋigo mo roosoe yaberu yaun yareega, buŋo oi moke maŋine kerisieme igokogaiŋ ore so mata. 30 Kotu kantri ŋoŋo oŋuakon ronekon Anuture mi so reŋgaru kosa gobuŋyon, Juda kufufuŋ foriine yoŋoji qoqomuku fukebuŋ ore eru Anutuŋi ŋoŋo ŋonemaŋiŋ ŋareme qowiriebuŋ.

31 Juda kufufuŋ foriine yoŋoji damaŋ yoo Anuture miqomukuru kosa go wapegobiyon, ŋoŋoji qowiriebuŋ ore eru Anutuŋi Juda kufufuŋ niŋo oŋuakon damaŋ yoo ŋonemaŋiŋ nor-eiŋgo manega. Kotu kantri ŋoŋoji maŋ-ŋaŋuŋ kerisieru qowiriebi ore mosiineŋi maŋyaŋuŋ bapakareega, ore eru yoŋoji oŋuakon afagaru maŋyaŋuŋ kerisieru ŋonemaŋiŋine biŋe qa yareniŋiŋ.

32 Niŋigo sosowo nonun Anutu qomukuru kosa gobeneŋ buŋo qoqomukunonun bofukeru niŋiŋ nobeya. Sosowo yobu ŋonemaŋiŋ noreiŋ ore eru niŋiŋi kipe nobeya. Oŋu.

Anutu miteŋ garu owaowa kiki iŋi keegobeneŋ:

* 11:27: Jer 31.33-34

33 Anutu yaunmoririinere rounji oi yasogo yobu fukega. Mamagore sia, mamaneine oi rarakaine tatariine tomiri. Manjboronjineji nodureru ropekiine yobu fukega. Inoji bujononun osoeru mitariega, nihoji oi sosowo mitani forekimiŋgo embimbiŋgakimiŋ. Gogononunde kadi burugaega, ore fuŋine oi maneru osoeru bofuke forekimiŋgo so mata.*

34 “Ofonde maŋ kiniŋinere buru oi niŋigo sosowoji mane mukukimiŋgo embimbiŋgaru go wapebeŋ. Moji kajeqouŋ buŋo oteŋ ore so mata.”*

35 “Moreŋ niŋigo yaun narengaren eegobenenyon, inoke onu ekimiŋgo embimbiŋgaru go wapebeŋ.

Ya otebeneŋ tifeine so bokirie noreko soine sagaga. Ya mo jiki noreinde tife oteŋgo embimbiŋgaegobeneŋ.”*

36 Oi yoore eru embimbiŋgaegobeneŋ: Inoji ya sosowore Rau fukeru fuŋqoduine fukega. Inoji ya sosowo maŋgo eteko fukeya. Oi inoyonunde kuriri bofukeŋ ore eru fukeya. Ore eru nonun tinabiŋeine miten gabeneŋ tatariine tomiri kuririineke pe roperu peŋ. Buŋo oi foriine.*

12

Gogononun urunu gobeneŋ Anuture sagaiŋ?

1 O maŋkekerisie ogopune, Anutuji onu nonemain noreya ore nonji maŋ-ŋanun inŋ

* 11:33: Ais 55.8 * 11:34: Ais 40.13 * 11:35: Job 41.11

* 11:36: 1 Kor 8.6

bapakarego: Nɔŋo ɲonemaɲine oi maɲ kininɲaɲunji manesuku ore so tifeine bokirieru ohoweine baku miteɲ garu goinebi. Oɲuakoɲ ɲoɲo-ɲaɲunde saki fu oi Anuture kikitin pesin ruainebi. Oɲu ruanimin ine, ɲoɲo gboreru gbagbataeɲine fukebi Anutuɲi pesin-ɲaɲun oi ɲoneme sagako aɲiine maneein.

² Rone morende eebobo sembenere buru boyoberu gobuɲyoɲ, damaɲ yoo oɲuine oi so jikigaru eku goinebi. Oɲu matayoɲ, maɲ mamaneɲaɲunji gboreko qowirieru goinebi. Oɲu goku Anutuɲi ɲoɲore aɲi uruɲu manega, oi baaru soine sanaɲgaru osoeru bofukenimin. Oi bofukeru ore so eenimin ine, kadi fiine boyobebi sagako kuririnɲaɲunke fukeenimin.

³ Jijibu kosa egu gonimin ore buɲo mo mibemin. Anutuɲi yaunmoriri nareme ore paio dimaku sosowo ɲoɲore inɲi ɲajigo: Nɔŋo ɲoɲo-ɲaɲunde manekabi ropekiine so fukeinɲyoɲ, moakoɲ moakoɲ ɲoɲo poretin ɲoɲo-ɲaɲe mane muku goinebi. Anutuɲi mamanesin noreko ore foriine fukeega ore so ɲoɲo-ɲaɲe oosoe eru ore so buɲo miku goinebi.

⁴ Ore fuɲine oi inɲi: Saki funoɲunji moakoɲ fukegayoɲ, saki fu tifenonɲun oi kokoine. Mobeine sosowo yoɲoji gio moakoɲ oɲuakoɲ so baegobi.*

⁵ Ore so maɲkekerisie ɲinɲigo noɲun oɲuakoɲ kokoine gogobeneyoɲ, jibu Kristoke qakatoru dimaku saki fu oɲuine foriine moakoɲ fukegobeneyoɲ. Moakoɲ fukegobeneyoɲ, bubu niɲoji

* **12:4:** 1 Kor 12.12

jikigaru eru moko gio babeneŋ sagako dimagobeneŋ.

⁶ Anutuji yaunmoririine noreya ore so gio bore mamane yaun furuine furuine raugaru gogobeneŋ. Moji kajeqouŋ giore mamane yaun biŋe qoqo ega ine, iŋoji oi gioo ruaeine. Mamane-siŋineji otesiŋgaega ore so gioo ruaru Anuture buŋo miku goine.* ⁷ More kiŋaŋqoqo giore mamane yaun oteya ine, ore so goine daman so bapi yaberu goine. More qaqaŋji gio bainde mamane yaun oteya ine, iŋoji boseqosembe tomiri daman so goine qaŋji yareru goine.

⁸ More maŋ kikitin giore mamane yaun oteya ine, iŋoji daman so yameŋ keku niŋigo maŋyaŋuŋ bapakareru kitin yaberu goine. Goineji yare basiqasi baku embimbiŋgabi more oi kitin yabeinde mamane yaun oteya ine, iŋoji tuturiine tomiri daman so kitiŋgaku bapi yaberu goine. More siŋanyayabe giore mamane yaun oteya ine, iŋoji qin keru dimaku goine siŋaŋ yaberu goine. More manjijojoko giore mamane yaun oteya, iŋoji gio oi jeri paio baku goigon. Onu.

Manjokore kadi oi poretiŋ boyobeinebi.

⁹ Noŋo kiko bokeru poretiŋ manjijojoko naduŋgadun eku goinebi. Sembene misomben baku ŋadi gaku goinebi. Oroinere eŋareme oo qakatoru goinebi. ¹⁰ Maŋkekerisie ogopuŋaŋuŋ oi waigo paiineo eyareku poretiŋ manjoko naduŋgadun eku goinebi. Araŋ qoqo naduŋgadun enimiŋgo yameŋ keegobi, oo aŋi sogo maneru mimiteŋ eru goinebi.

* 12:6: 1 Kor 12.4-11

¹¹ Maŋ-ŋaŋunji so gbaŋiru wirieinyon, onga wosibi Moro Tiriineji dobe ŋabeko jojoinke dimaku Ofonde gio baku goinebi. ¹² Ŋoŋo senŋinbaŋin bofukekimiŋgo odigaru oori eru jeri paio goinebi. Suroŋqoqo maneru kariuru goinebi. Ŋoŋo damaŋ so dimaku Anutu onga wosigaru goinebi. ¹³ Anuturu ŋiŋigo gbagbataeŋineji yare embimbiŋgagobi, oi bapi yaberu goinebi. Ŋoŋo ŋiŋigo kepore yaberu moko ŋeku uqo munjaŋ noku jeri eku goinebi.

¹⁴ Kekesuesue eŋareegobi, ŋiŋigo oi so qaiso yabeinebiyon, ŋoŋo Anutu onga wosigabi mifia ŋareeiŋ.* ¹⁵ Jeriegobi, yoŋoke bapi yaberu jerieinebi. Kuyogobi, yoŋoke bapi yaberu kuyoinebi. ¹⁶ Bio maŋmoakon eyareku womoo goinebi. Ŋoŋo-ŋaŋunde so manebi ropeine. Jauba-iriŋbiriŋ so einebiyon, ŋiŋigo wakiqoqoine oi ogo eyareku goinebi. Ŋoŋo-ŋaŋunde manebi maŋboron ŋiŋigo gogobi ore so, so fukeine.*

¹⁷ Minde mibe, nunde gube, ende ebe oi more so einebi. Ŋiŋigo sosowoji mosi goine yoŋore manebi eebobo fiine fukegobi, oi yameŋ keku baku goinebi. ¹⁸ Ya more embiŋqombiŋ so egobi, sasanŋ pe ŋarega ore so yameŋ keku ŋiŋigo sosowo yoŋoke womoo goinebi.

¹⁹ Buŋo mo oi Biŋe Quraŋgo iŋi quraŋgabi pega, “Nonji sembenere tife bokiriebe paiyaŋuŋgo ropeiŋ. Oi nonde gio. Ofon nonji onu migo.” Ore eru yoro ogopune, ŋoŋo-ŋaŋe sembenere geo

* **12:14:** Mat 5.44; Luk 6.28 * **12:16:** Qoq 3.7

so bokirieinebiyon, oi Anuture bokebi maņine rigaņgame iņore tife bokirieru bomuku ņabeiņ.*

²⁰ Ore eru oi ņoņo-ņane so bokirieinebiyon, Biņe buņo yo boyoberu goinebi, “Rosigoji uqore komega ine, oi uqo gume. Gore rosiji obure manega ine, oi obu otende noine. Oņu eku gore mosi fiine oiji maņ bapakare etende mimiine maneru bokena.” Buņo oi boyoberu goinebi.*

²¹ Moji mosi sembene oiji egu gbiņ egareiņyon, gake mosi fiine eru oiji gbiņ eteru mosiine sembene oi gboremiņ. Oņu.

13

Gawman yoņore buņo yukuyaņuņgo raru reņgaru goinebi.

¹ Gawman mo oi iņoyoņe akon so fukeyayon, Anutu, usun Rauine iņoji oi gawman igodonęako ore so Sogunenonęunde usun paio dimaku siņaņ noreegobi. Mimiti giore kukure oi Anutu. Ore eru ņoņo sosowo ņoņo-ņaņunde gawman yoņore buņo rurumaņgo raru goinebi. ² Funine oņu manegobi ore eru moji mimiti siņaņ yoņore usun qopiega, iņo Anutuji gogore buru ruaya, oi qopiega. Mimiti Rauine qopiegobi, Anutuji yoņore buņo mitariku geoine bokirie yareme yobiņ bofukeniņ.

³ Siņaņbobo yoņoji ņiņigo eebobo sembene baegobi, oi kokoi mamane eyareegobiyon, fiine baegobi, oi oņuine so eyareegobi. Ore eru siņaņ usunyaņuņke yoņore kokoi maneiņgo manege me

* **12:19:** Dut 32.35 * **12:20:** Qoq 25.21-22

mata? Oi so maneŋgo manege ine, eebobo fiine eba eku gokande miteŋ gunimiŋ.

⁴ Gawman yoŋoji oi Anutu kiŋaŋ qa teru bobiaŋ gunimiŋgo manegobi. Oŋu manegobi ore ŋiŋigo sembene fukegobi, ore goine bokiriebi paiyaŋuŋgo ropeme yobiŋ manenimiŋ ore dimagobi. Anuture kiŋaŋqoqopu fukebi kambantire siqo sogo yareya, oi omaine yobu so baku gogobi. Ore eru ya sembene ege ine, go kokoi maneru goigoŋ. ⁵ Yobiŋ paiyaŋuŋgo egu ropeiŋ ore gawman miyaŋuŋ reŋgaru goinebi. Ore akon matayoŋ, Anuture jiŋoo oŋuakon sagaiŋgo ore oŋu eku goinebi. So reŋgabi Anuture maŋ rigaŋgame miko maŋ wombunyaŋuŋgo oŋu manebi maŋyaŋuŋji egu sembeaiŋ ore oŋuakon gawman yoŋore buŋo yukuineo raru goinebi.

⁶ Gawman yoŋoji oi Anuture gio mobe mo baku oo qiŋ keru dimaku siŋaŋ ŋabeegobi. Gioyaŋuŋ oi banimiŋ ore ŋoŋoji bapi yaberu takis oŋuakon eegobi. ⁷ Gawmande takis ruaru kikitin fuŋne fuŋne wojimu yarenimiŋ ore miegobi, oi sosowo ore so yareeinebi. Gawmande takis fuŋne fuŋne sosowo yareru komuniti gio oi poretiŋ baeinebi. Gawmande gio bobo ŋiŋigo yoŋore kobi eru aran ba yareeinebi. Oŋu.*

Damaŋ yasogoji bembengako jojoko naduŋgadun eru goinebi.

⁸ Oŋu eku more tife mo ŋoŋoke so eko goinebi. Jibu ŋoŋore tifeŋaŋuŋ moakon oi damaŋ so inji pega: Ŋoŋo manji jojoko naduŋgadun eku

* **13:7:** Mat 22.21; Mak 12.17; Luk 20.25

goinebi. Moji goine jojoko manyaun eyareega, injoji Kadi buño boyobe foreega.

⁹ Mimiti buño qoruine oi inji, “Gake manji jojoko eege, ore so goine sosowo manjoko eyareeigon.” Buño ore maŋgo mimiti buño yo onjuine pegobi, “Boesau so eigon,” “Ninigo mo so qande komein,” “Kian so baigon,” “Yare so sase eigon.” Oi eru mimiti buño goine sosowo oi buño qoruine ore meaineo fukegobi.*

¹⁰ Ninigo mo manji jojoko etege ine, inore ya sembene mo so eteigon. Ore eru manjoko eru onjuine oo mimiti buño sosowo renġaru boy-obege.

¹¹ Damaŋ yoore fuŋne mane mukugobi ore eebobo onjuine eba eku goinebi. Rone Kristo manesin garu maŋnonuŋ kerisiebeneŋ, damaŋ oo akon funġaru go wapebeneŋ Ofonji bomuku nobeko Sombuŋgo ropekimin, ore damaŋineji maŋfunġo ware forega. Ore eru njoŋo kuban pegobi, oone maŋ-nanun gboreko pakareniminde damaŋ oi warega. ¹² Ubu joroine gobeneŋ wegı jinjoine jojirinġo wape tamainġo ega. Ore eru qisirire eebobo oi keririkebi wakiko tatamainere jigo qakiminde kuriri oi ro kebi rakame dimainebeneŋ.

¹³ Tatamare maŋgo gogobeneŋ ore so eebobo gbagbataeneine eba eku goinebeneŋ. Goineji jebe pati eru kanenji noegobi, onjuine noku obu sananine noku bobojibu eegobi. Sau ekeson eru kosa nigo kian poreegobi. Pouguru roinġaru kekepari eru kiki rorori eru manji roroin maneru nanadi eegobi. Eebobo onjuine oi so sagaga.

* **13:9:** Eks 20.13-15, 17; Dut 5.17-19, 21; Lew 19.18

14 Maɲ sakire aɲi sanaɲine sembeneji gboreru pakerebi yokore aɲi egu reɲganimiɲ ore oi kaje so ruaru so manesuku yabeeinebi. Oɲu matayoɲ, Ofonɲ Yesu Kristo iɲore eeboboji oi tebe garikiɲ-ɲaɲuɲ fukeko oi mariku oɲuine keru goinebi. Oɲu.

14

Ogo gbagbaɲine oi so miyareru goinebi.

¹ Monde mamanansiɲi gbagbaɲine fukeko oi siɲaɲ maɲgo eyareru kepore teru goinebi. Inoke mimane eku migobobo buɲo fukeko ore eru pepesisiri so eku goinebi.* ² Goineji mamane-siɲyaɲunde so uqo munjaɲ sosowo soine noegobiyon, goine yoɲore mamanansiɲi gbagbaɲine fukeko uqo kuɲgaɲine akon noegobi. Maɲyaɲunji egu kejigaiɲ ore maɲyoka eru joma nemu gbom yoɲore pesiɲ ruruaine oi misomben eku munjaɲ akon iɲoyoɲe rigaru noegobi. ³ Uqo munjaɲ sosowo noegobi, iɲoji ogopuyaɲuɲ munjaɲ akon noegobi, oi mipemiriɲ so eyareru goinebi. Anutuɲi ogopuɲaɲuɲ uqo munjaɲ sosowo noegobi, oi oɲuakon “Sagagobi,” miku ɲonemaɲ eyareega. Ore eru munjaɲ akon noegobi, ɲoɲoji ogopuɲaɲuɲ yoɲore buɲo so mitariinebi.

⁴ Goji wamo fukeru more kiɲaɲqoqo mitari tenon? Inoji oi iɲoyoɲe rauinere jiɲoo buɲore mobe miko osoeru mitarime sagako dimaiɲ me yobiɲ paiineo ropeko wakiɲ. Ofonji sananɲaru qiɲ keru dimaiɲ ore kitiɲ gateeiɲ. Ore eru soine qiɲ keru dimaiɲ.

* 14:1: Kol 2.16

5 Goineji una kokoinere manesubi kamasiyanuḡ sogokonḡ egobiyonḡ, goineji unaine unaine osoeru una more manebi ropeko fuḡine mo fukeko una goineji ore mea yukuineo fukegobi. Nonḡo moakonḡ moakonḡ nonḡo-nḡanunde mamananego qakatoru oo manyoka sosowo yoberu koimo dimaku goinebi. 6 Goineji unaine unaine osoeru roperu wakiru ruaegobi, yonḡoji oi Ofonḡ tinabiḡe oteḡḡo maneru eegobi. Goineji joma sosowo noegobi, yonḡoji Anutu miteḡ garu Ofonḡi onḡu tinabiḡeineke fukeḡ ore noegobi. Goineji joma goinere sowo goegobi, yonḡoji Ofonḡi tinabiḡeineke fukeḡ ore maneru oi eegobi eru onḡu goku Anutu miteḡ gaegobi. 7 Nonḡundeone moji inḡoyonḡere akonḡ so goga eru inḡoyonḡere akonḡ so komeḡ.

8 Ore fuḡine oi inḡi: Gariine gokimiḡ ine, gogononḡuḡ Ofondeo kisiḡgaru gokimiḡ. Komekimiḡ ine, Ofondeo komekimiḡ. Ore eru gokimiḡ me komekimiḡ ine, Ofonde biḡe fukegobeneḡ. 9 Kristoji komebuḡ eru jinḡoke gogobeneḡ, sosowo nonḡunde Ofonḡ fukeru goinḡo ore komeru gboreya. 10 Anutuḡi sosowo oga noberu inḡoyonḡere buḡo koroino rua nobeko dimakimiḡ. Ore eru goine nonḡoji wamo fukeru maḡkekerisie ogopunḡanḡuḡ mitari yareegobi? Onḡuakonḡ ogopune goine nonḡoji wamore maḡkekerisie ogopunḡanḡuḡ goine oi mipemiriḡ eyareegobi? Pougaru roroḡ ebi mosinḡanḡuḡ oiji so sagaga.* 11 Ore buḡoine oi Biḡe Quraḡḡo inḡi quraḡḡabi pega,

* **14:10:** 2 Kor 5.10

“Ofoŋ nonji goku sananŋago, ore so buŋo foriine yobu inŋi ŋajigo: Nŋiŋigo sosowo ŋoŋo nonde jŋo maio dikanji keru miŋanŋunji Anutu nonŋ miteŋ nunimiŋ.”*

¹² Buŋo ore so nonŋunŋ sosowoji bubu eebobononŋunde sundu oi Anutu ojiru mitaniŋgabeneŋ osoe nobeiŋ. Onŋu.

Moji odetatanŋaru egu waki qaiŋ ore mane-suinebi.

¹³ Ore eru so jikigaru mimisembe eru buŋonŋanŋunŋ so mitariinebi. Maŋkekerisie ogopunŋanŋunŋ yoŋore kadio odetatanŋaru egu waki yabeiŋ ore ya mo oi so ruaeinebi. Ore buŋoine yameŋ keku mikipeinebi. ¹⁴ Uqo munjanŋ ya moji inoyonŋe akonŋ wuwununŋineke so fukegayonŋ, ŋiŋigoji yare manebi wuwununŋineke fukega, yoŋoyonŋunde akonŋ oi wuwununŋineke fukega. Nonji Ofoŋ Yesuke dimaku buŋo oi maneru ore eru manyoka mo so manego.

¹⁵ Anutuŋi uqo munjanŋ sosowo munanŋ qa foreko gbagbataeŋine fukegobiyonŋ, jibu ogopunonŋunŋ goineji sowobotuyanŋunŋ eru joma goine so noegobi. Kristoji yoŋore eru komeyayonŋ, goine ŋoŋoji wamore joma noku onŋuine oiji yoŋore maŋ bosembeaegobi? Onŋuineo ŋoŋo-ŋanŋunde anŋi boyobebi maŋkekerisie ogopunŋanŋunji ore eru beusembe bofukeegobi, onŋuine oo manji jojokore kadi oi so jikigaru boyobeegobi.

¹⁶ Mamane fiine pe ŋaregayonŋ, ore paiineo eebobonŋanŋunji kosa ebi goineji ore eru buŋo urugo miku miyareegobi. Onŋu egu enimiŋ

* **14:11:** Ais 45.23

ore ɲoɲo sisiɲaɲ eku goinebi. ¹⁷ Wamo uqo nokimiɲ eru wamo obu nokimiɲ, oiji Anuture qorumande moge so fukega. Ya oiji oi wawakiine fukega. Inore qorumaɲ maɲineo gogore fori oi inji: Moro Tiriineji dobe nobeko eebobo poretiɲ boyobebeneɲ womo qa noreko jerieru gogobeneɲ. Oiji mogeine fukega. ¹⁸ Uri yonɲoji oɲu eru Kristore kiɲaɲ qaegobi, yonɲoji Anuture jinoo sagabi ɲinɲoji buɲoyaɲuɲ manebi saga yabeega.

¹⁹ Ore eru niɲo womo ee ebeneɲ maɲmoakonji saueiɲgo ore yameɲ keinebeneɲ. Oɲuine oo maɲnoɲuɲ bobiaɲgaru babasanaɲ einebeneɲ. ²⁰ Anutuji uqo munjaɲ sosowo munaj qa foreko gbagbataeɲine fukegobi, oi manegobeneɲyon, moji joma me uqo mo noko ogoinere manji ore eru sembeako yombeneɲine fukeko agiburaɲke fukega, oiji so sagaga. Moji goine yonore so manesuku inoyonere akon maneru kosa noga, inɲoji oɲuakon agiburaɲke fukeiɲ. Ore eru Anutuji yonore maɲyaɲuɲgo gio baya, goine ɲoɲoji gioine fiine oi uqore eru so bosembeainebi.

²¹ Ore eru maɲkokerisie ogopuɲaɲuɲ yonore eru jomare sowo goku wain obu oi so noku goinebi. Oɲuine oo moko bobobian enimiɲ. Oɲuakon maɲ-ɲaɲuɲji yare me yare eru sembeako agiburaɲke fukeru gbaɲiena, ɲoɲoji oi so einebi. Oɲu moko bobobian enimiɲ. ²² Pepesisiri buɲore mamananine oɲu me oɲu pe garega, oi Anuture jinɲo maio sabareku goigon. Moji buɲo more “Sagaga,” miku oo qakatoru mane sanaɲgaru ore eru inoyonere so mimitari ega, inɲoji kiwaqawaineke fukega.

²³ Oi me oi mameseŋ paiineo so dimaku eegobeneŋ, oi sosowo agiburaŋ fukega. Ore eru moji uqo more manyoka eru jibu oi naga, iŋoji agiburaŋ eiŋ. Mameseŋ paiineo so dimaku nega ore Anutuji iŋore buŋo mitarime qunŋgaru yobiŋ bofukeiŋ. Oŋu.

15

Njoŋo Kristore mamesesu boyoberu goinebi.

¹ Mameseŋnoŋunji sanaŋ qanqanŋine fukega, niŋoji noŋunde akoŋ kosa jerieru noŋunde aŋigo egu gokimiŋ. Goine yoŋore mameseŋi gbagbaŋine fukeko fogaturuŋgo kadi odureru poretiŋ so boyobeegobi, noŋuŋ oi manjijojoko eyareku yobiŋyaŋuŋ osiganimiŋ ore bapi yabeinebeneŋ. ² Noŋuŋ moakoŋ moakoŋ ogopunoŋunji fianimiŋgo so manesuku bapi yabeinebeneŋ. Oŋu eyareku manyaŋuŋ bobiaŋgabi sasaŋ bofukeniŋ. ³ Kristoji oŋuakoŋ iŋoyoŋere akoŋ iŋoyoŋunde aŋigo so jerieyayoŋ, Biŋe buŋo yoore so etebi goya, “Niŋigo buŋo fofoine miku go migareegobi, yoŋore buŋoji oi nuko joiserereŋine maneego.” Buŋo oŋu pega.*

⁴ Anutuji noŋunde ore aŋiine iŋi maneega: Noŋuŋ yameŋ keku sanaŋgaru dimaku Biŋe Quraŋ osegabeneŋ maŋnoŋuŋ kitiŋgako oŋuine oo seŋgiŋbaŋiŋ fukekimiŋgo odigaru oori eru gokimiŋ. Ore eru Biŋe buŋo sosowo ronekoŋ quraŋgabun, Anutuji ore so qaji noreiŋgo manega. Ore eru oi quraŋgabi pega. ⁵ Anutuji

* 15:3: Kiki 69.9

inoyonɛ maŋ-ŋaŋuŋ kitingako soine yameŋ keku sananɔaru dimainebe. Inoŋi Moroine ŋareme dobe ŋabeko botuŋaŋuŋgo manji kikipe eku Kristo Yesure mamanesu boyoberu goinebe.

⁶ Onu goku soine maŋmoakon paiineo miŋaŋuŋ qodureru Anutu, Ofonononun Yesu Kristore Mama oi miteŋ garu goinebe. Anutuŋi ŋonɔ onu eru gonimiŋ ore maneega. Onu.

Bobian Biŋeji kantri goineo raru wareya.

⁷ Kristoŋi ŋonɔ mane sabareku maŋgo enareega, ore so ŋonɔ onuakon maŋgo sisinaŋ eku goinebe. Anuture tinabiŋeji saueiŋ ore onu eru goinebe. ⁸ Nonji buŋo foriine yo mibemiŋ: Anutuŋi buŋoine buŋoine Juda kufufuŋ niŋore funɔbodupu yonore mikipeya, oiji foriineke fukeiŋgo maneya. Ore eru Kristo soreme Anuture Biŋe buŋo fofori sananɔaŋgo ore eru Juda niŋore botugo wakiru kiŋaŋ qa noreru goya. ⁹ Juda niŋo kiŋaŋ qa noreru goyayon, kantri goine yonɔŋi onuakon inore ŋonemaŋ maneru ore eru Anutu miteŋ garu gogobi. Ore buŋoine oi Biŋe Quraŋgo ini quraŋgabi pega,

“Ore eru nonji kantri goine yonore botugo goku miteŋ guru tinabiŋegoŋi saueinde kiki keebemiŋ.”*

¹⁰ Ore buŋoine mo oi ini miku quraŋgabi pega, “Anutuŋi Juda niŋo roosoe nobeko kufufuŋine fukeru jerieegobeneŋ. Kantri goine ŋonɔ niŋoke jikigaru jerieru kokorian eru goinebe.”*

* **15:9:** 2 Sml 22.50; Kiki 18.49 * **15:10:** Dut 32.43

11 Ore buṅoine mo oi inji,
 “Kotu kantrire kubu sosowo ṅoṅo oi Ofon miteṅ
 garu goinebi. Kae so gogobi, ṅoṅo oi
 sosowo ‘Anutu danḡe!’ miku kiki keku
 goinebi.”*

12 Kajeḡouṅ ṅi Aisaia inḡoji oṅuakonḡ ore buṅoine
 inji miko pega,

“Yo goduone gidaine pougaru pakarega, ore so
 ṅi tinaine Jesi inḡore osigidagone mo fukeru
 ṅiṅigo moreṅ so siṅaṅ yabeṅ.

Oṅu eyareme morende kufufuṅ sosowo yoṅoji
 bapi yabeṅḡo odigaru oori eru gonimiṅ.”

Buṅo ranḡbanḡine oiji damaṅ yoo foriineke fu-
 keega.*

13 Moro Tiriinere usunji kitiṅ ṅabeko
 oorinḡanḡunji sananḡaru sananḡ qanḡanḡine fukeṅḡo
 manego. Ore eru oori Rauine Anutu inḡoji womo
 eyareku jeri sosowo oiji maṅ-ṅanḡuṅ bofuseine.
 Oṅu oṅḡa wosibe soine Anutu manesiṅ gaku
 seṅḡinḡbanḡiṅ bofukeniṅḡo odigaru oori eru
 gonimiṅ. Oṅu.

Buṅo sananḡine oi uruṅḡure quranḡago?

14 O maṅkekerisie ogopune, nake ṅoṅore inji
 mane sananḡago: ṅoṅo mutu so gogobiyoṅ,
 Anutuḡi ya sosowo fiine oi maṅ-ṅanḡuṅḡo ruame
 puseko mamane fuṅne fuṅne bofukeru oiji soine
 uṅsowonḡ buṅo qaji nadunḡadunḡ enimiṅ ore so
 fukegobi. 15 Oṅu fukegobiyoṅ, jibu buṅo oi egu
 niga ṅabeṅḡo maneru ore fuṅine oi moke keg-
 bore ṅarego. Anutuḡi yaunḡmoriri nareko ore paio

* 15:11: Kiki 117.1 * 15:12: Ais 11.10

dimago ore koimo paiineo buŋo sanan qanqanine goine quraŋga ŋarego.

¹⁶ Ore fuŋine iŋi: Anutuji kotu kantri ŋoŋoji maŋ-ŋaŋuŋ kerisiebi Moro Tiriineji bagbagbaga yabeme gbagbataeŋine fukenimingo maneege. Rone boji rigabi kondunineji ropeko Anutuji jerieya, ore so damaŋ yoo Anutuji ŋiŋigo moreŋ so biŋeine fukebi ŋone yaberu jerieiŋ ore aŋi sogo maneege. Ore eru Bobiaŋ Biŋeine kantri goine yoŋore botugo misaueiŋgo miku gioine paineo ruame ore so mande giore siŋaŋ fukeru Kristo Yesure kiŋaŋ qaego.

¹⁷ Ore eru Kristo Yesuke qakatoru dimaku Anuture gio babe biŋeroro nareme sakine ba ropeku koimo dimago. ¹⁸ Kristoji kantri goine yoŋoji Anuture mi reŋganimiŋ ore maneru boburoru bapakare nuega, oiji maŋgo enareko buŋone miku eebobone baego. Buŋo goine kosa misaueinde koimo oi so pe narega.

¹⁹ Moro Tiriinere usunji maŋgo enareko mosi qoqowirie moge usunyanunke fukebuŋ. Nonji Jerusalem siti bokeru kantriine kantriine roregaru raru raru Yuopre siti mo tinaine Iirikum oo ropebe. Onu moreŋ so roregaru Kristore Bobiaŋ Biŋe oi mitaniŋga yare foreboŋ. ²⁰ Moji otuŋ sariko moji wareru iŋoyoŋe piine ore paiineo baku buŋoineke fukeiŋ. Ore so moji Kristore buŋoji mamanesinde otuŋ sari foreko dimaya, nonji wareru iŋore otuŋ paiineo ode sananaru dimaku manyanun jikigaru bobianaru basanaŋ yabebemiŋgo useru gobon. Mande gio fuŋfuŋgaine baku oiji kuririquraŋne

bofukeiŋgo yamenŋ keku gobonŋ. Ore eru ŋiŋigo uri yoŋoji Kristore tina so maneru mutu gobuŋ, nonji Bobianŋ Biŋe yoŋore mitaniŋgabeminde aŋine sogo maneru gobonŋ. ²¹ Ore buŋoine Biŋe Quraŋgo iŋi quraŋgabi pega,

“Uri yoŋoji buŋoine so yajibi manebuŋ, yoŋoji goku oi ŋonenimiŋ. Uri yoŋoji fuŋine rone so maneru mutu gobuŋ, yoŋoji goku oi mane taniŋganimiŋ.”*

²² Gio oŋuineji kipe nuya ore damanŋ so ŋoŋoreo warebeminde embimbiŋgaru gobonŋ. Oŋu.*

Polji Rom rarare buruine ruaya.

²³ Oŋu gobonŋyoŋ, roregaru maŋbapakare gio fuŋfuŋgaine baku kae sosowo mane yabegobeneŋ, oo oi ba foreru gobonŋ. Mande gio fuŋfuŋgaine babemiŋ ore kaeine oi damanŋ yoo moke so pega. Oŋuakoŋ ŋoŋo ŋone ŋabebeminde aŋi maneru gobe gosa kokoine tariya. ²⁴ Ore eru kantri tinaine Spein rabemiŋ, ore ŋadiineo ŋoŋoreo warebeminde buru ruaru ŋone ŋabebemiŋ ore oori eru iŋi manego: ŋone ŋaberu ŋoŋoke jeri eru kokiine mo aŋibaŋi ŋebe bapi nubi soine kadi jikigaru Spein rabemiŋ.

²⁵ Oŋu manegoyoŋ, damanŋ yoo Jerusalem sitire kufufuŋ gbagbataeŋine kitiŋga yabekimiŋ ore oo rabemiŋ. Oo raru ŋoŋoreo warebemiŋ.* ²⁶ Masedonia eru Akaia prowins yoyoka yokore maŋkekerisie kufufuŋ kubuine kubuine yoŋoji Jerusalem sitire ŋiŋigo gbagbataeŋine bapi yarekiminde buŋo kipebuŋ. Anuture ŋiŋigo

* 15:21: Ais 52.15 * 15:22: Rom 1.13 * 15:25: 1 Kor 16.1-4

gbagbataenine wakiqoqoine gogobi, yoṅore buṅo kiperu pesiṅ kokoine soguine ruaru qodurebi oi roru raru yarebemiṅ.

²⁷ Oṅu ruaniminde manjeri maneru buṅo kiperu qoqodure pesiṅ yasogo oi ruabuṅ. Oṅu eniminde tife pe ṅareko ruabi soine sagaga. Anutuji Juda kufufuṅ mifia noreinde buṅo miko eko mifia oiji kotu kantriine kantriine sagaru paiyaṅuṅgo ropeko gogobi. Ore eru kotu kantri yoṅore tife eko mobeine bokirieru yaunṅyaṅunji Juda kufufunde wakiqoqoine bapi yabebi sagaga.*

²⁸ Nonji yaun oi roru raru meyaṅuṅgo ruabe gione oiji tariko ore ṅadiineo oi boke yaberu iqi akon ṅoṅoreo wareru ṅone ṅaberu ṅadio jikigaru Spein kantrigo rabemiṅ. ²⁹ ṅoṅoreo warebemiṅ, damaṅ oo Kristore mifia oi sosowo roru wareru ṅarebemiṅ. Oṅu mane mukugo.

³⁰ O maṅkerisie ogopune, nonji Ofon Yesu Kristoke qakatoru dimaku iṅi maṅ bapakare ṅabego: Moro Tiriineji manjoko eteru kitiṅ ṅabeega ore so nonde eru Anutu oṅga wosiru goinebi. Jogbasasanaṅ ego, oo manjokonaṅunji bapi nuru goinebi.

³¹ Judia prowinsgo raru ṅiṅigo Kristore qoqo-muku eegobi, yoṅore meo egu ropebemiṅ ore Anuturu oṅga wosibi dobu kipe narena. Oṅuakon pesiṅ yaun yasogo roru Jerusalem raru ṅiṅigo gbagbataenine yoṅore meo ruabe sagako anjiine manenimiṅgo ore oṅga wosiru goinebi. ³² Oṅu oṅga wosibi Anutuji anj oṅu manega ine, nonji jeri paiineo ṅoṅoreo wareru ṅoṅoke anjibanj ṅeku

* 15:27: 1 Kor 9.11

beufi enarebi gobemij. ³³ Womo Rauine Anutu inoji sosowo ɲoɲoke dimaine. Buɲo oi foriine.

16

Momojo buɲo tatarine

¹ Ogonoɲuɲ Fibi (Foibe) inoji Senkria maɲkekerisie kufufunde gio bobo ɲigo fukega. Inoji Rom ɲoɲoreo wareiɲ, oi siɲaɲ maɲgo etenimiɲ ore weu ɲareru meɲaɲuɲgo ruago. ² Inoji ɲiɲigo kokoine eru non ɲɲuakonɲ bapi noberu goya. Ore eru Anuture ɲiɲigo gbagbataeɲineji ogopunoɲuɲ kepore yareegobeneɲ, ore so Fibiji wareme oi Ofonde tinao oɲga wosigaru keporeinebi. ɲoɲoreo wareru ya more embimbiɲgako ore so bapiniɲ.

³ ɲoe ɲonuɲ yoyoka Prisila eru Akwila Kristo Yesuke dimagobire, muranyokane oi nonde momojo mibi manenimi.* ⁴ Yokoji nonde eru gogoyakuɲ kisiɲgaru komenimi ore fukebu. Nonji akonɲ so miteɲ yapegoyonɲ, kantri goineo maɲkekerisie kufufuɲ kubuine kubuine yonɲoji oi ɲɲuakonɲ yokore ore danɲe miegobi.

⁵ Maɲkekerisie kufufuɲ piyakuɲgo tumaɲgaegobi, oi ɲɲuakonɲ nonde momojo mibi maneniɲ. Eisia prowinsgo gio babe foriine fuɲfuɲgaɲineji fukeko Epainetus inoji maɲine kerisieru Kristore biɲe fukeya, yoro ogone oi nonde momojo mibi maneɲ. ⁶ Mariaji ɲoɲore eru gio soguine baku goya, iɲore nonde momojo mibi maneɲ. ⁷ Andronikus eru Junias tifeyokane yokoji rone Kristoreo qakatobire nonji yokore

* 16:3: Apo 18.2

ɲadigo maɲne kerisiebe ore ɲadio noke witi pigo goben. Aposol yoɲoji yokore ore manebi botuyanɲngo ropekiine fukegobire. Oi nonde momojo mibi manenimi.

⁸ Yoro ogone Ampliatuŝ Ofoɲke dimaga, iɲore nonde momojo mibi manein. ⁹ Neɲanoɲuɲ Urbanuŝ Kristoke dimaga eru yoro ogone Stakiŝ yoko nonde momojo mibi manenimi. ¹⁰ Apeleŝ Anutuɲi eesoŝ oteme sagako Kristoke ɲakatoru dimaga, iɲore nonde momojo mibi manein. Aristobuluŝke pi moko gogobi, yoɲore nonde momojo mibi manein. ¹¹ Tifene Herodion iɲo nonde momojo mibi manein. Narsisuŝke Ofoɲke ɲakatoru pi moakoɲ gogobi, yoɲo nonde momojo mibi manenimin.

¹² Trifina eru Trifosa ɲigo yoyoka yokoɲi gio yasogo baku Ofoɲke dimagobire, yoko nonde momojo mibi manenimi. Yoro ɲigo ogone Persis iɲoji Ofonde gio soguine yobu baku goga, iɲo nonde momojo mibi manein. ¹³ Rufuŝ iɲoji Ofonde gio fiine yobu baega eru iɲore maɲgo damaɲ so noɲ oɲuakoɲ madeine oɲuine siɲaɲ maɲgo enareku goya, yokore nonde momojo mibi manenimi.*

¹⁴ Asiɲkrituŝ, Flegon, Hermeŝ, Patrobaŝ, Hermaŝ eru maɲkekerisie ogo goine yoɲoke dimaku gogobi, yoɲore nonde momojo mibi manenimin.

¹⁵ Filologuŝ, Julia, Nereuŝ seɲineke eru Olimpiŝ eru ɲiɲigo gbagbataenine goine sosowo yoɲoke gogobi, yoɲore nonde momojo mibi manenimin.

¹⁶ Maɲkekerisie ogopunoɲuɲ yoɲore botugo kokobo eru meayanɲuɲ soseku miɲeriyanɲuɲ eku

* **16:13:** Mak 15.21

goinebi. Kristore maŋkekerisie kufufuŋ sosowo yoŋoji momojoyaŋuŋ ruabi ŋoŋoreo foga. Oŋu.

Uŋsowoŋ buŋo tatarine

¹⁷ O maŋkekerisie ogopune, nonji maŋ-ŋaŋuŋ iŋi bapakareru ŋajigo: Ŋiŋigo goineji maŋ ro-roiŋ fukeiŋ ore qoru qaegobi, yoŋore eru sisiŋaŋ eku goinebi. Maŋmoakonde mosi fiine qaji yarebi manegobiyoŋ, buŋo oi qomukuru pepe-sisiri buŋo goine oiji maŋ-ŋaŋuŋ bapakarebi sembeako quŋgaru wakiegobi. Ŋiŋigo oŋuine oi boke yaberu jojorigo goinebi. ¹⁸ Ŋiŋigo oŋuineji noŋunde Ofon Kristore gio so baegobiyoŋ, yoŋoyaŋunde aŋire so fukeiŋ ore gigiraŋ miku yoŋoyoŋe kiŋaŋ qaegobi. Jiji buŋo fiine fiine aŋiineke miku ŋiŋigo kikoyaŋuŋ tomiri yoŋore maŋyaŋuŋ bapakareru eadu yabeegobi.

¹⁹ Ŋoŋo Bobiaŋ Biŋe reŋgaru boyobeegobi, buŋo oi sosowo niŋore kajego rakame manegobeneŋ. Ore eru nonji ŋoŋore eru mokemoke yobu jerieego. Oŋu egoyoŋ, ŋoŋo iŋi eru gonimiŋgo manego: Ŋoŋo sembene baniminde maŋgboroŋ-ŋaŋuŋ bokebi wakiŋ. Gio oroine baniminde maŋgboroŋ-ŋaŋuŋ oi damaŋ so kegboreru bosogueinebi. ²⁰ Womo Rauine Anutu iŋoji Satan pipa odejaŋgako ŋoŋore yukuo wakiko kokoriaŋ eru jerieru gonimiŋ.

Ofonŋoŋuŋ Yesure yaŋuŋmoririji ŋoŋoke peine.

²¹ Nonde muraŋ Timoti iŋoji momojoine ruame ŋoŋoreo foga. Nonde tifepune Lusius, Jeison eru Sosipater yoŋoji oŋuakoŋ momojoyaŋuŋ ruabi ŋoŋoreo foga.*

* **16:21:** Apo 16.1

²² Tertius nonji Polre buᅇo maneru quraᅇ yoo quraᅇgago, nonji oᅇuakoᅇ Ofoᅇke dimaku momojone ruabe ᅇoᅇoreo foga.

²³ Gaiusji piine mitarime gobe maᅇkekerisie kufufuᅇ sosowo yoᅇoji oᅇuakoᅇ yoo wareru tumangabi uqo aᅇibaᅇi enoreega, iᅇoji momojoine ruame ᅇoᅇoreo foga. Erastus iᅇoji sitire siᅇaᅇ muraᅇinere ofis maᅇgo takis moner siᅇaᅇ gaega eru maᅇkekerisie ogonoᅇuᅇ Kwartus yokoᅇi momojoyakuᅇ ruabire ᅇoᅇoreo foga.* ²⁴ Ofoᅇnoᅇuᅇ Yesu Kristore yaunmoririineji ᅇoᅇoke peine. Buᅇo oi foriine.

Ofoᅇ miteᅇ garu iᅇi oᅇga wosiego:

²⁵ Bobiaᅇ Biᅇe buᅇo foriine oi ronere ronekoᅇgo go wapebuᅇ, oo soᅇsoᅇgo peya. Oᅇu peko Yesuji wakiru barariᅇga noreru mitaniᅇgako maneru misaueego. Biᅇe buᅇo ore so Anutuᅇi sanangaru mamanesiᅇ-ᅇaᅇuᅇ basanangako soine qiᅇ keru dimaku sanangainebi. Ore eru noᅇuᅇ Anuture tinabiᅇe miteᅇ gabenerᅇ saueeiᅇ.

²⁶ Rone Biᅇe buᅇo foriineji sumuᅇineo pe wapeyayoᅇ, damaᅇ yoo kajeqouᅇ ᅇiᅇigo quraᅇ quraᅇgabi pega ore so totogo fukeya. Anutuᅇi damaᅇ so go waperu tatariine tomiri go ropeiᅇ, iᅇoji ᅇiᅇigo kubuine kubuine noᅇuᅇ maᅇnoᅇuᅇ kerisieru Biᅇe buᅇo manesiᅇ garu reᅇgaru gokimiᅇgo manega. Ore eru gio iᅇi bakimiᅇ ore mitiga noreya, “ᅇoᅇo raru moreᅇ so roregaru Biᅇe buᅇo mitaniᅇgaru goinebi.” Buᅇo

* **16:23:** Apo 19.29; 1 Kor 1.14; 2 Tim 4.20

ore so niŋoji Biŋe buŋo oi ŋiŋigo kubu sosowo manenimiŋ ore mitaniŋgaru gobeŋ.

²⁷ Anutu inoyoŋe akoŋ maŋboronŋ Rauine fukega, nonuŋ Yesu Kristore tinao inore tinabiŋe miteŋ gabeneŋ damaŋ tatariine tomiri kuriri-ineke pe roperu peiŋ. Buŋo oi foriine.

**Manʒekerisiere Bine Quran Jojofɔ Gariine
The New Testament in the Mape Language of Papua
New Guinea**

Nupela Testamen long tokples Mape long Niugini

Copyright © 2008 The Bible Society of Papua New Guinea

Language: Mape

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-24

PDF generated using Haiola and XeLaTeX on 11 Nov 2022 from source files dated 9 Oct 2020

8278cae8-b7ff-5cfb-8118-7ef9b429ffd9